


TULO KA MATANG SA MGA MAGTOTOO

 Iduko nato ang atong mga ulo. Samtang nga nagduko ang atong mga ulo, ug ang atong mga kasingkasing, pila kaha ang gusto nga mahinumduman diha sa pag-ampo, mahimo ba nga ipataas lang ang inyong kamot, moingon, “Ginoo, hinumdumi ako, Oh Ginoo.” Daghan kaayong mga paghangyo ang ania dinhi, ania na napahimutang ang mga panyo ibabaw sa lamesa.

² Mahal nga Langitnong Amahan, nagkatigum na usab kami ning gabhiona sa ilalum niining atop, kon diin nga gikatagbo Mo kami sa makadaghan nang higayon, ug gipahayag ang Imong gugma kanamo; sa diha nga ginapaninguhaan namo nga maipahayag sa mapainubsanon nga paagi ang among gugma ug pagpasalamat diha Kanimo, tungod sa Imong mga gibuhat alang kanamo. Ug karong gabhiona nagaduol na usab kami, Ginoo, ingon nga mga tawong may panginahanglan, kay kanunay kaming nanginahanglan Kanimo. Ug samtang nga ania kami sa kalibutan, nahibalo kami nga kana mao ang mamahimong tuaw, tungod kay ania kami sa usa ka pagpakiggubat. Ug kami . . . Nagakagrabe na ang mao nga pagpakiggubat, ug nagsaad Ka ug nag-ingon kung unsa nga ang kaaway mamahimong sama sa usa na ka nagangulob nga leon. Binuhian siya diha sa taliwala sa mga tawo, ug makita namo kini sa kung asa na lang, nga sama sa usa ka nagangulob nga leon nga ginatukob ang mahimo niyang matukob, tungod nga nasayod siya nga ang iyang panahon hamubo ra. Apan aduna kami—aduna kami og usa—usa ka Amahan nga nagabantay sa Iyang gagmay’ng mga anak, ug nganha Kanimo kami nagapalagiw uban sa among mga hangyo, karong gabhiona, Ginoo. Nagaampo kami nga Imong itugot ang mga niini.

³ Ug kining mga panyo nga napahimutang dinhi, Amahan, nagapasabot nga adunay mga tawong masakiton sa kung asa man sa niining kayutaan, ug nga nagapanawagan ug nanginahanglan Kanimo, ug nagatoo Kanimo, sa paggamit sa ilang pagtoo dinhi sa pagpadala niining mga panyo. Dios, itugot nga mamaayo ang matag usa kanila.

⁴ Makita namo ang daku Mong gahum, Ginoo, dili pa lang dugay didto sa niadtong lawak, nga gibalik ang hingpit nga panumduman sa usa ka batang lalaki nga nawala na unta. Makita namo ang Imong dakung gahum, matag karon ug unya, nga ginatangtang ang balatian ug ginabutyag ang tinago sa

kasingkasing, ug ginapakita ngadto sa mga tawo, ug ginatul-id sila diha sa kahan-ayan. Ginapasalamatan Ka namo, Ginoong Dios, tungod kay lagpas kana sa mahimo ni kinsa man nga tawo. Lagpas na kana sa bisan unsa man nga nahibaloan ni kinsa man kanamo, kung unsa nga mahimo Mong ipadayag ang pinaka-hinungdan, ug kung unsa ang nakapahimo niini, ug kung unsa na kini. Ikaw kana, Amahan. Ug nasayod kami, nga, “Ang Pulong nagasusi sa mga kasingkasing, ug ingon nga usa ka Magtutugkad sa mga hunahuna ug katuyoan sa kasingkasing,” busa ginapasalamatan Ka namo tungod niini.

⁵ Ug karon, Ginoo, nagatoo kami nga ang mga tawo karon, nga nanagduko sa ilang mga ulo, ginahunahuna kining mga butanga, ug ang Balaang Espiritu kini nga nagapakigsulti kanila. Ug itugot nga ang matag usa sa ilang mga hangyo matubag. Luwasa ang mga mahimong maluwas, Ginoo, karong gabhiona. Ang mga nahisalaag, hinaut nga mosulod sila ug mangaluwas.

⁶ Mapasalamatan kami kaayo nga makita kanang daghan, dakung tipun-og sa basa nga mga sinina dinha, sa pagkasayod nga nabuksan na ang lubnganan; ug ang kasal-anan sa daan nga pagkatawo nailubong na, para sa kadaghanan kanila. Ug ginapasalamatan ko Ikaw tungod niini, Amahan. Ug hinaut nga magalakaw sila diha sa bag-o na nga Kinabuhi, sa nahibilin sa ilang mga adlaw. Pinaagi sa Ngalan ni Jesus Cristo, amo kining ginapangamuyo. Amen.

⁷ Pagapanalanginan kamo sa Ginoo, itugot nga ang mga paghangyo nga aduna kamo diha sa inyong kasingkasing matubag.

⁸ Karon, nagtoo ko nga nag-ingon si Billy nga adunay gamay nga bata si Igsoong Wheeler. Husto ba kana? Nasayup ba ako dinha, aron unta nga ihalad, o kung unsa man, o sa paghalad. [Nagaingon si Igsoong Neville, “Nagtoo ko nga adunay tulo o upat ka gagmay’ng mga bata.”—Ed.] Sige. Kung gusto ninyo karon nga dalhon sila dinhi, malipay kami; kung makaanhi unta ang mga elder sa atubangan, pagapandongan sa kamot ang maong gagmay’ng mga bata, alang sa paghalad nga panerbisyo. Ug paninguhaon nato nga mamahimong hamubo lang. Ug gusto namo nga kining gagmay nga mga bata, nga gustong moduol kang Ginoong Jesus, gustong magdala sa ilang—sa ilang gagmay nga mga mutya nga gihatag kanila sa Dios. Kanunay namong ginapaninguhaan nga maghatag kanila og paagi, tungod kay wala kita nahibalo kung unsa ang mahitabo ugma.

⁹ Ginasulti kanako sa akong inahan kaniadto, “Ayaw ilangan, para ugma, kung unsa ang mahimo mo karong adlaw.” Husto kana, tungod kay wala ka nahibalo kung unsa ang mahitabo ugma, apan nahibalo kita kung Kinsa ang nagakuput sa ugma. Kana ang pinaka-importante nga bahin. Nahibalo kita kung Kinsa ang nagakuput sa ugma.

¹⁰ Igsoong Wheeler, ang Ginoong Dios magapanalangin kanimo. Ug kini si Igsoon nga babayeng Wheeler. Nalipay gyud ako nga makaila kanimo. Ug akong . . .daku kong prebilibiyo, sa unang higayon, sa pagtoo ko, ingon nga nahibaloan ko, nga mailhan ka. Ug kini ang imong gamay nga bata. Unsa'y iyang ngalan? [Nagaingon si Igsoon nga babayeng Wheeler, "Carlena Rebecca."—Ed.] Carlena Rebecca. Bueno, pagkabuutan nga batang babaye, pagkatahum gayud niya. Karon, gamay nga Carlena Rebecca Wheeler.

¹¹ Si Igsoon nga Lalaking Wheeler usa sa atong mga diyakono dinhi sa iglesia, ug gipanalanginan sa Dios ang ilang kaminyoon, sa niining gamay nga bata. Nagtoo ko nga aduna ka'y, mga, sa nahibaloan ko, duha pa ka mga batang babaye, dili ba? [Nagaingon si Igsoong Wheeler, "Tulo."—Ed.] Tulo pa ka mga batang babaye. Pagkabuutan kaayo nila nga mga babaye, sa nasabtan ko, ug busa nagaampo ako nga himoon sa Dios si Rebecca nga pareho sa uban pa kanila. Kita n'yo? Ug kung ingon-ana mamahimo nga kalipayan kana para kaninyong tanan, dili ba? Husto kana, tungod kay makapahimuot sila kaayo nga mga bata.

¹² Wala ko kabalo kung magpakugos ba siya kanako o dili, apan, kung dili man, pandongan nato siya og mga kamot. Gusto mo bang moduol dinhi kanako, Rebecca? Gusto mo bang kuguson ta ka? Maayo kaayo. Pagkatahum kaayo nga batang babaye!

Karon iduko nato ang atong mga ulo.

¹³ Mapanalanginon nga Langitnong Amahan, sa diha nga nagatindog kami dinhi sa atubangan niini nga diyakono, karong gabhiona; ug usa gayud ka maayo kaayo nga katungdanan ang iyang ginakuptan, kay ang usa ka diyakono kinahanglan nga masuta nga walay-ikasaway kaniya, bana sa usa ra ka asawa, maayo ang pagdumala sa iyang panimalay. Kay, kung dili siya kabalo kung unsaon ang pagdumala sa iyang panimalay, unsaon man niya pagdumala sa balay sa Dios? Ug nagapasalamat kami Kanimo nga kini nga igsoon nakatuman niining mga kuwalipikasyon, ug nakita namo diha kaniya ang Espiritu sa Dios.

¹⁴ Ug iyang ginadala karon ang iyang gamay nga anak nga babaye dinhi, aron nga ihalad. Imo gibutang kini diha sa ilang mga bukton aron padakuon. Dios, ug daw sa unsa kami ka mapasalamaton, nga makasulti kami, nga ang ilang pangandoy mao nga mamahimo siyang sama sa uban pa sa iyang mga igsoong babaye. Itugot, Amahan, nga mamahimong ingon niana kini. Ug hinaut nga ang maong bata mabuhi ug—ug mamahimong usa ka hilabihan nga pagpangalagad nganha Kanimo, Amahan. Ug karon, sa Ngalan ni Jesus Cristo, among ginahalad kini nga bata Kanimo para sa usa ka kinabuhi nga

pagpangalagad. Himoa siya nga mapiskay, lig-on; hinaut nga mabuhi siya nga hataas ang kinabuhi, hangtud nga moabot si Jesus, kung mahimo man kana. Ug dayon, Amahan, nagatoo kami nga pagapadakuon siya diha sa mga panambag ni Cristo. Ug among ginahalad Kanimo ang iyang kinabuhi, alang sa usa ka kinabuhi nga pagpangalagad. Amen.

¹⁵ Panalanginan ka sa Dios, Rebecca. Ug panalanginan ka sa Dios, Igsoon nga Lalaking Wheeler ug Igsoong Babayeng Wheeler. Ang Ginoo magauban kaninyo.

¹⁶ Kumusta ka? Karon ania ang usa pa ka gamay nga batang babaye nga may usa ka dakung pahiyum diha sa iyang nawong. Ug unsa'y iyang ngalan? [Nagaingon ang inahan, "Rhonda Renee Coats."—Ed.] Rhonda Renee Coats husto ba kana? Paryente kaha mo ni Jesse ug kanila, ni Jesse Coats? ["Dili."] Nahunahunaan ko lang. . . Kaila ko ang pipila ka mga Coats dinhi sa siyudad. Suod ko gyud sila, ug dugay—dugay ko na silang mga higala sulod—sulod sa hataas na nga panahon.

¹⁷ Rhonda, Rhonda Renee. Unsa kaha kung moduol ka dinhi kanako, Rhonda? Akong—Ihatag ta ka dayon balik sa imong mama, pagkahuman mismo nga gihalad ka na namo kang Ginoong Jesus. Karon, pagkabuutan gayud niya!

Karon iduko nato ang atong mga ulo.

¹⁸ Langitnong Amahan, ingon nga Imong elder ug uban ako nga nagatindog karong gabhiona, diha sa pagpakig-uyon ug pagpahiangay sa Ebanghelyo, ginadala sa niining inahan kining gamay nga si Rhonda Renee diha Kanimo alang sa paghalad. Imo kining gibutang diha sa mga bukton sa maong inahan, aron atimanon, ug ang unang butang nga mahimo niya mao ang pag-presentar niini balik Kanimo. Sama sa giingon ni Job kaniadto, ang Ginoo ang nagahatag sa niini nga mga butang. Ug nagaampo kami, Dios, nga papadayunon Mo siya nga luwas hangtud sa takna nga Ikaw magakuha na. Ug, Dios, itugot nga magkinabuhi siya og usa ka tinuod nga Cristohanong pagkinabuhi ug nga mamahimong usa ka ehemplo sa uban, samtang siya nga nagadaku. Panalangini ang iyang panimalay, ug hinaut nga maihalad kini Kanimo, nga usa ka bug-os nga pagpangalagad, uban sa matinuuron nga kasingkasing. Ug karon, Dios, among ginahalad Kanimo ang gamay nga si Rhonda Renee Coats, sa Ngalan ni Jesus Cristo, alang sa usa ka kinabuhi nga pagpangalagad. Amen.

Pagkabuutan gayud! Panalanginan ka sa Dios, igsoon.

¹⁹ Kumusta ka na! [Nagaingon ang igsoong babaye, "Robert Paul Shammel."—Ed.] Robert Paul Shane? ["Shammel."—Ed.] Shammel.

²⁰ Bueno, unsa kung. . . Ug medyo batan-on ka pa gayud, wala ko gihunahuna nga hilabihan ang mamahimong kalipay mo bahin niini. Ayaw ako kataw-i nga sama niana. Tan-aw dinhi,

kung gusto mo og usa ka butang nga kataw-an. Robert Paul, pagkamaanindot nga ngalan!

Atong iduko ang atong mga ulo.

²¹ Dios, sa diha nga kining batan-on nga babaye nagaduol dinhi; mao lamang, nga para kanamo, mahimong usa pa ka bata. Ug ginahalad niya ang gamay niyang anak nga lalaki, Oh Dios, ingon nga usa ka kinabuhi sa pagpangalagad para Kanimo. Kini ang bunga ug ang resulta sa ilang kaminyoon. Nagaampo ako, Dios, ingon nga Imong elder ug akong ginapandongan kining gamay nga bata, nga ang iyang kinabuhi maihalad diha Kanimo. Itugot, Ginoo, kung aduna pa’y ugma, hinaut nga pagadalhon niya ang Mensahe nga ang iyang—nga ginapaminawan sa iyang mga ginikanan, Dios. Itugot kini. Ug nagaampo ako nga Imong panalanginan ang ilang panimalay, ug hinaut nga mapadaku ang mao nga bata diha sa mga pagtambag sa Dios, ug mamahimo nga usa—usa ka mahigugmaon nga tinun-an Nimo. Amo siyang ginahalad Kanimo sa Ngalan ni Jesus Cristo. Amen.

²² Bueno, siya—usa gayud siya ka maayo nga bata. Kana lang. Oo, sir. Wala ka na’y mahangyo og mas maanindot pa, dili ba? Wala na og unsa man sa kalibutan nga mas maanindot, husto kana, kay sa niana nga bata. Pirmi gayud nakapahiyum! Dili ba makapahimuot gayud? [Ang kongregasyon nagaingon, “Amen.”—Ed.]

²³ Mao kana usa ka higayon nga gikaibogan sa akong asawa ang akong trabaho, ang pagkugos sa niining gagmay’ng mga bata. Gusto niya gayud nga makakugos kanila. Ug ako, usab, apan kanunay akong nahadlok nga mapiang ko sila. Sila’y, kabalo na mo, makapahimuot gayud ug medyo huyang pa, apan, kabalo na mo, sila’y—sila sa tinuod mas lig-on kay sa kung unsay mahimo nato.

²⁴ Karon, nasulti ko kaninyo nga papahaman na ako . . . Bueno, aduna ko’y trayntay singko na lang ka minutos. Kinahanglan ko na nga mag-agpas, dili ba? Tan-awon nato. Ako—ako—dili ko tuyo nga—nga maghukom sa unsa man nga sayup, o magsulti sa unsa man nga sayup, apan paninguhaon ko gayud og ayo, tungod kay . . . Kabalo na mo, human nga taastaas na ang—ang atong naabtan, kita dili—dili na kita ingon ka aktibo nga sama kaniadto, kabalo na mo. Ang mga milya kung usahay nagkasagalsalon, ug duha o tulo pa lang ka panerbisyo sa usa ka adlaw, aba . . .

²⁵ Ug ang pinaka-hinungdan nga bahin, mao kadtong mga panan-awon. Ang pagwali wala nagapahago kanako. Ay, mahimo akong motindog dinhi sa tibuok adlaw, dili kini makapa-problema kanako, apan akong . . . Apan kadtong mga panan-awon gayud, ug pag-ania sa niini nga mga pagpakighinabi ang mga tawo, apan kana man ang kinahanglan nga magkaaduna sila. Kita n’yo? Kana ang hinungdan kon ngano

nga ania sila dinhi. Butang kini nga dili lamang masulbad sa pagpandong og mga kamot. Kinahanglan niini nga mahibaloan ang ugat, ang sinugdanan niini, unsay hinungdan niini, unsay nakapahimo niini, ug dayon unsay buhaton aron makalingkawas niini. Mao kana ang gianhi nila dinhi.

²⁶ Karon, magasugod ang panagtigum, sa adlaw pagkahuman ugmang gabii. . .o, dili, pasayloa ko ninyo, sa Miyerkules sa gabii diay, didto sa Shreveport, Louisiana. Ug kung kinsa man kaninyo nga may mga higala didto nga dapit, aba, sultihi sila nga magtambong. Sa Life Tabernacle, siguro, mao kon diin kini—kini mosugod, gawas lamang kung mabalhin kini didto sa awditoryum, kung makuha nila kana, nga makahatag kanila og mas halapad nga lugar nga malingkuran. Apan nakuha na nila kaniadto ang balkonahe sa itaas, ug ang pinakadaku nga andana, ug dayon ang andana pa nga ubos niana. Busa, wala ko kabalo kung unsay eksaktong gidaghanon ang mapalingkod niini, apan usa kini ka. . .Kung tuman gyud kini ka piut, tingali mahimo natong kuhaon ang mao nga awditoryum nga sa atbang lang niini, nga maoy. . .Wala ako kabalo kung unsa kadaghan ang mapalingkod niini, usab. Nakapahigayon na ako og panerbisyo didto, apan dili ko na mahinumduman. Usa kini ka—usa ka pang-tinuig nga kumbensiyon.

²⁷ Atua ako didto tulo na ka tuig ang milabay, ug gisugdan namo ang usa ka rebaybal, sa Ngalan sa Ginoo, ug wala gayud kini mihunong, sukad. Nagpadayon gayud, nga sige-sige; adlaw-adlaw, ang mga tawo nga nagatambong, nagakaluwas, ginabautismohan, ug nagapadayon sa Ginoo nga sama niana, nga ministro ug tanan na nagatambong mismo. Ug ato gayud. . .Basta nga sige kini nagapadayon nga sama niana, ug makapabilin ako dinhi, gusto kong bisitahan kini sa tanang panahon, ug magpaambit og pipila sa akong mga pagpamulong ug—ug padayon na.

²⁸ Karon, magasugod kana sa Miyerkules, ug magatapos sa Dominggo. Ang Christian Business Men's breakfast. . .wala ko kabalo. . .nalimtan ko ang ngalan niadtong hotel. . .nagtoo ko nga kini. . .gitawag og. . .Ilang, sultihan kamo nila pag-atua na kamo didto. Ang pamahaw kini sa mga magpapatigayon.

²⁹ Nagkaaduna kami og halangdon nga kahigayonan didto, sa inyo nga mga magpapatigayon dinhi, niadtong ulahing higayon nato didto. Giluwas sa Ginoo ang usa—usa ka rabbi, didto sa mao nga siyudad. Ug, oh, wala na ko kabalo kung unsa na ang nahitabo tanan. Usa gayud kadto ka halangdon nga kahigayonan diha sa Ginoo, didto, nga ginawali ang mahitungod sa Pakigsaad sa Dugo. Busa kita. . .Mao kana ang nahibaloan sa mga Judio; nga ang dugo kadto. “Gawas sa pag-ula og dugo, walay mahimong pasaylo sa mga sala,” nakita n'yo.

30 Karon diretso na kita sa Pulong, ug buhaton ko ang mahimo ko nga tumanon ang gisulti ko kaninyo.

31 Ug karon, kung itugot sa Ginoo karon, sa Dominggo human sa Pasko, kung nakabakasyon kamo ug nagabiyahe, dili madanglog ug tanan na, aba, kung kamo—kung kamo haduol ra dinhi, aba, hapit mo. Ug nagaplano kami nga magpahigayon og usa ka panerbisyo dinhi sa buntag sa Dominggo, sa—sa—sa Dominggo pagkahuman sa Pasko. Unsa ba’y petsa nianang panahona? [Adunay nagaingon, “Ika-baynte nuebe.”—Ed.] Ika-baynte nuebe, sa adlaw sa ika-baynte nuebe, ug ang Dominggo kana pagkahuman sa Pasko, ika-baynte nuebe nga adlaw. Karon, kung mahitabo man nga kami, kung unsa man, nga dili kami, ug dili makaanhi . . . Wala kita nahibalo sa umalabot, kabalo na mo. Apan kung aduna ma’y mahitabo, aba, kamo nga nagapuyo gawas sa siyudad, nga mianhi, sama sa mga kaigsoonan nga mga taga-Memphis . . .

32 Gusto kong madungog si Igsoong Ungren nga nagakanta sa *How Great Thou Art*. Ug wala ko . . . Ania ba siya karong gabhiona?

33 Ug, busa, ug kanunay akong aduna og daghan kaayong mga butang, dili ko kini tanan matapos, dili ko kini tanan matapos. Panalanginan kamo sa Dios, kamong mga tawo.

34 Karon moabli kita sa Mga Kasulatan karon alang lamang sa usa—usa ka hamubo nga pagbasa sa Kasulatan. Kon diin, nga mapakyas man ang akong mga pulong, Kini dili gayud. Ug kung ingon-ana panalanginan kamo sa Dios sa pagpabilin, tungod lang sa pagpaminaw sa Iyang Pulong. “Ang pagtoo nagagikan sa pagpatalinhug, sa pagpatalinhug sa Pulong sa Dios.” Husto ba kana? Karon sama sa gihunahuna ko . . . Samtang, nga nagaabli kamo diha sa San Juan sa ika-6 nga kapitulo, sugod sa ika-60 nga bersekulo, ug ginabasa ang ika-71, lakip na tanan. San Juan 6:60.

35 Karon gihunahuna ko, samtang nga nagadungaw ako kaganina lang sa bintana, ug ginalantaw ang pagsalup sa adlaw ug makita kung unsa nga ang tibuok kinaiyahan adunay balaod. Ug sa diha nga nagaabot ang tingtugnaw, ang mao nga balaod, diha sa iyaha lang, sa kinaiyahan, ginapapanaug ang duga paingon sa mga gamut sa kahoy. Ginalubong kini.

36 Sama sa giingon ni Job, “Oh, nga sa sheol unta tagoan Mo ako, nga Imo unta akong ibutang sa tago nga lugar hangtud nga mahupay ang Imong kaligutgut.” Ug karon, mao kana, “Kung Imo unta ako itago!” Kita n’yo, iyang nakita ang—ang kinaiyahan, ang kahoy, nagapanaug ang kinabuhi niini ngadto sa mga gamut; Igsoong Way. “Ug magpabilin didto hangtud nga ang kaligutgut mahupay, ug dayon pagatawgon ako ug takdoan ako og panahon.” Kita n’yo?

37 Ang kinaiyahan adunay balaod. Adunay balaod ang kinaiyahan; wala man lang og unsa man nga paagi aron malutsan kini. Balaod kini sa kinaiyahan. Ug dayon adunay balaod sa espiritu; aduna, usab, og walay unsa man nga paagi nga malutsan kini.

38 Nagpakigsulti ako kaganinang hapon sa usa ka magtiayon, mahitungod sa, dili mo mahimo nga bug-os hanawon ang unsa man nga butang. Dili mahimo sa mga tawo ang pagpanghanaw. Mahimo nila nga manggun-ob, apan dili sila makapanghanaw. Ug adunay miingon, “Bueno, unsa man diay ang pagkuha og pagsunog sa usa ka papel, dili ba ginahanaw niana kini?” Dili, sir. Ginabungkag lang niini ang mga kemikal, tungod sa init sa kalayo. Nagabalik kini mismo ngadto sa pagka-gas, kung unsa kini sa sinugdanan. Dili mo mahimo ang paghanaw. Ug kung magpadayon man ang kalibutan og madugay-dugay pa, kanang mao ra nga gas, kana ug—ug ang mga kemikal nga atua kaniadto sa niana nga papel, mahimong mobalik mismo ug mamahimong usa na usab ka papel. Eksakto gyud kana. Dili ninyo mahimo ang pagpanghanaw. Eksakto.

39 Ang Dios, kung ingon-ana. Kung adunay pagkabanhaw sa tanan nga butang, nga nagabalik pag-usab, ug walay pagkahanaw, adunay pagkabanhaw ang mga matarung, oo, ug siguradong magabalik kita. Ingon niana lang kini. Wala man lang paagi nga mahimo kini. Bisan pa kung nasunog ka, kung nalumos ka man, bisan asa pa kini nahitabo, dili sa mga niini mahimo ang pagpanghanaw.

40 Hinumdumi gayud nga ang matag kabahin nimo ania na dinhi, sa diha nga gisulti sa Dios ang kalibutan ngadto sa pagkatungha. Gibutang na Niya ang imong lawas dinhi niadtong tungora mismo. Ug walay unsa man nga makapahanaw niana gawas sa Dios. Nagabalik kini tanan ngadto sa Iyang mga kamot. Kita n’yo? Ug Siya mao ang Usa, ang Usa nga, ang Magbubuhay, mao ang Usa Nga nagsaad, busa makasigurado kita nga adunay Kinabuhi nga Walay Katapusan. Ug aduna kita’y kasiguradohan diha sa atong mga kasingkasing karon, nga aduna kita karon og Kinabuhi nga Dayon, Kinabuhing Walay Katapusan nga dili mahimong mamatay, nga ania na kanato karon. Bueno.

41 San Juan 6. Sugdan nato karon sa ika-6 nga kapitulo sa San Juan, ug sugod sa ika-60 nga bersekulo.

Busa daghan sa iyang mga tinun-an, nga sa ilang pagkadungog, pagkadungog niini, nanag-ingon, Lisud kining sultiha; kinsay makapatalinghug niini?

Unya sa pagkahibalo ni Jesus . . . sa iyang kaugalingon nga ang iyang mga tinun-an nanagbagulbol mahitungod niini, ug miingon siya kanila, Nakapangdol ba kini kanimo?

Unsa man diay . . . kung inyo nang makita ang Anak sa tawo nga magasaka ngadto sa dapit diin siya didto kaniadto?

Kini—kini ba . . . ang espiritu mao ang nagahatag og kinabuhi; ug ang unod walay kapuslanan: ang mga pulong nga akong ginapamulong kaninyo, kini espiritu (Siya kana), ug kinabuhi. (Unsa ba’y Iyang giingon? “Ako mao ang Kamatuoran, ang Kinabuhi.”) . . . kini espiritu, . . . kini kinabuhi.

Apan adunay uban kaninyo nga wala nagatoo. Kay si Jesus nasayod man sukad sa sinugdan kung kinsa kadto ang wala nagatoo, ug kinsa ang magabudhi kaniya.

Ug siya miingon, Tungod niini nga hinungdan nag-ingon ako kaninyo, nga walay tawo makaduol nganhi kanako, gawas kung kini gitugot kaniya sa Amahan.

Ug tapos niini daghan sa iyang mga tinun-an mitalikod, ug wala na managpanglakaw uban kaniya. (“Lisud kining sultiha,” kita n’yo, dili niya kini madawat.)

Busa si Jesus nangutana sa napulog duha, Buot ba usab kamo motalikod kanako?

Si Simon Pedro mitubag kaniya, Ginoo, kang kinsa man kami moadto? kay ikaw ang may mga pulong sa kinabuhi nga walay katapusan.

Ug kami nagatoo niana ug kami nakasigurado nga ikaw mao ang Cristo, ang Anak sa buhi nga Dios. (Sus!)

Si Jesus mitubag kaniya, Wala ko ba pilia kamong napulo ug duha, ug usa kaninyo yawa?

Nagpasabot siya niini mahitungod kang Judas nga anak ni Simon Escariote: kay siya mao ang magatugyan sa pagbudhi kaniya, sanglit usa sa napulo ug duha.

⁴² Karon, kung akong tawgon kini nga hilisgutan karong gabhiona, ug paninguhaon ang pinakamahimo ko aron himoon kanang tunga sa oras nga mapuslanon, gusto kong hisgotan ang mahitungod sa: *Tulo Ka Matang Sa Mga Magtotoo*.

⁴³ Ug kanunay kong ginasulti ang maong pamahayag. Ug nahunahunaan ko, “Bueno, siguro magawali na lang ako mahitungod niini sa usa ka higayon, karon nga hapon.” Gihunahuna ko kana.

⁴⁴ Ang una maoy mga magtotoo, mga nagapatoo-too, ug mga dili-magtotoo. Karon, talagsaon kana nga—nga—nga hilisgutan. Apan, sa ingon ka sigurado nga nagalingkod kita dinhi karong gabhiona, ingon niana usab ka magkauban nga nagakatigum kanunay kana nga grupo. Kung asa man motigum ang mga tawo, makita nato kini nga grupo, ug nakita gayud nato sila

kanunay, ug mahimo nga kanunay nato silang makita hangtud na sa Pag-abot sa Ginoo. Ug gusto ko kanato karong gabhiona, nga maihulagway ang atong mga kaugalingon, samtang nga nagahisgot ako mahitungod sa niining tulo ka mga grupo, ug makita kung unsa kita nga grupo nahiapil.

⁴⁵ Karon hinumdumi, nagasulti ako dinhi tingali ngadto sa . . . Niining iglesia, nga puno na usab kaayo karong gabhiona, sa palibot, ug sa mga dingding ug sa mga agianan na, apan nagasulti usab ako ngadto sa tibuok kalibutan. Kita n'yo? Sa tanang nagkalainlaing bahin sa kalibutan, nagakaylap kini nga mga teyp, sa mga ministerio sa maong mga teyp.

⁴⁶ Karon gusto kong maghisgot mahitungod sa tulo ka nagkalainlaing nga tipo sa mga magtotoo karon. Karon hinumdumi, *mga magtotoo*, ang hilisgutan ko mao ang *mga magtotoo*. Ang usa kanila maoy usa ka matuod nga magtotoo, ug ang sunod mao ang usa ka nagpatoo-too, ug ang sunod usab mao ang dili-magtotoo. Kita n'yo?

⁴⁷ Karon, ang unang grupo nga gusto natong pagahisgotan, mao ang magtotoo. Tungod kay, nagtoo ko nga siya mao ang angay nga mauna, tungod kay siya mao ang tinuod gayud nga nagatoo, karon, nagatoo sama sa mga tinun-an kaniadto nga nagtoo dinhi. Atong gamiton ang kining pagbasa sa Kasulatan ingon nga panig-ingnan. Karon, ang una mao ang mga magtotoo, ang tinuod nga mga magtotoo. “Ug ang pagtoo nagagikan sa pagpatalinghug, sa pagpatalinghug sa Pulong sa Dios,” sa Pulong sa Dios, nga mao si Cristo. Kita n'yo, mga magtotoo!

⁴⁸ Karon, nahimatikdan ba ninyo kining halangdon nga pamahayag nga gihimo sa niini nga magtotoo? Karon, ang usa ka magtotoo dili kinahanglan nga usa ka maalam nga tawo diha sa pang-kalibutan nga paagi sa pagkamaalam. Dili niya kinahanglan nga mamahimong usa ka edukado nga tawo sa paagi nga ginapaninguhaan sa niining mga tawo nga—nga isulti nga kinahanglan kang mamahimong ingon niana; apan dili mo kana kinahanglan. Imong . . . Ang kining tawo nga nagsulti sa niini nga pamahayag, ang Biblia Mismo nag-ingon nga siya parehong “walay hibangkaagan” ug “walay edukasyon.” Si Pedro, dili gayud siya mahimong ilhon nga usa ka maalamon nga tawo.

⁴⁹ Diha sa Isaias 35, nagaingon, “Didto may usa ka dalan, ug usa ka alagianan, ug kini pagatawgon, ‘Ang alagianan sa pagkabalaan.’ Ang mahugaw dili moagi sa ibabaw niini.”

⁵⁰ Nagpakigsulti ako sa usa sa mga diyakono kaganinang hapon, sa diha nga nahisgotan namo ang mahitungod sa mga taytayan nga nagasumpay palabang, ug kining usa pa nga bag-o. Ingon ko, “Adunay daghang mga taytay palabang sa mga kalaparan sa tubig, sa mga agianan sa tubig sa karon.” Ug ingon ko, “Apan adunay usa ka dakung taytayan nga nagaabot gikan

sa yuta hangtud sa Kahimayaan, gitawag kini, ‘Ang Dalan sa Hari.’ Ang mga mahugaw dili moagi niini.” Husto kana. Kini usa—usa ka dalan nga gitukod ni Cristo nga atong Ginoo, ang mao nga taytayan gihimo gikan niining yuta paingon ngadto sa Usa pa ka Kayutaan, ug ang mga mahugaw dili makaagi niini.

⁵¹ Si Pedro, kining wala nakaeskwela nga tawo, nga usa ka . . . haduol nga nagatindog didto, sa diha nga nakita niya ang tuman ka gipanghimatud—an nga Pulong sa maong panahon, nga nagsaad ang Dios alang niadtong panahona nga adunay Usa nga motungha nga mamahimong usa—usa ka Propeta sa taliwala nila. Ug malisod kaniadto kang Simon nga matoohan kini, tungod kay mahimong aduna na’y daghan nga mga pagsundog-sundog Niini. Apan sa diha nga nakita niya ang maong tinuod, naipahayag nga Pulong sa niadto nga kapanahonan, ug nadungog Kini nga nagapaila Kini sa eksakto, siya—siya nakumbinse gayud kung Kinsa Kini. Ug siya kadtong, nag-ingon, “Ginoo, kang kinsa man kami moadto?” sa diha nga gipangutana kini kaniya.

⁵² Sa diha nga ang—ang kadaghanan nagkabungkag na, tali sa mga magtotoo, ug sa mga dili-magtotoo, ug sa mga nagapatoo-too, atua tanan silang tulo nga nagatindog mismo didto sa niadtong usa ra ka pundok sa mga tawo; mga magtotoo, mga nagapatoo-too, ug mga dili-magtotoo, makita sa niining kapitulo mismo dinhi. Ug tungod nga gisulti ni Jesus ang mao nga mga Pulong sa paagi nga gihimo Niya, nagpabungkag kini sa Iyang kongregasyon. Apan kinahanglan nga mabuhat kadto.

⁵³ Usa Siya ka halangdon nga tawo samtang nga nagapang-ayo pa Siya sa mga masakiton, apan sa diha nga kini miabot na sa Doktrina ug pag-propesiya, mao kana ang nagapabulag sa—sa dagami gikan sa trigo. Kita n’yo? Ginaputos lamang sa dagami ang trigo. Dili pa kini ang trigo. Dili kini mahimong gamiton. Wala kini kapuslanan. Walay kinabuhi diha niini. Tahop kini, ug dili na kini mahimong mopabilin pa sa trigo. Dili kini mamahimong manunod kauban sa trigo. Ug busa aduna kini . . . Ang lugas lang ang ginahisgotan nato, ang kasingkasing mismo sa lugas sa trigo.

⁵⁴ Karon himatikdi, nakumbinse si Pedro nga Kadto mao ang Mesias. Karon, walay kabilingan kung unsa ma’y gisulti sa uban pa kanila. Walay kabilingan kung unsa ma’y gisulti sa mga sacerdote. Walay kabilingan kadto kang Simon Pedro kung unsa ma’y gisulti sa iglesia. Kumbinsido siya, mismo.

⁵⁵ Giingnan siya ni Jesus, didto sa usa ka dapit kon diin Siya nangutana, “Unsa ma’y sulti sa mga tawo kung kinsa Ako?”

⁵⁶ “Ug sulti sa uban nga Ikaw ‘usa ka propeta,’ ug ang uban miingon nga Ikaw ‘usa sa karaang mga propeta nga mitungha,’ ug—ug Ikaw ‘si Moises,’ o ‘si Elias,’ o kung kinsa man.”

Miingon Siya, “*Kamo* ang gipangutana Ko. Unsa ma’y sa hunahuna ninyo?”

⁵⁷ Ug mitubag si Pedro, “Ikaw mao ang Cristo, ang Anak sa buhi nga Dios.”

⁵⁸ Miingon Siya, “Bulahan ikaw, nga anak ni Jonas; Simon, nga anak ni Jonas; kay wala kini gipadayag kanimo sa unod ug sa dugo. Wala gyud nimo kini natun-an gikan sa usa ka libro, o gikan sa usa man ka kredo, o gikan man sa katekismo. Ikaw. . . Ang Akong Amahan, nga anaa sa Langit, ang nagpadayag niini kanimo.” Kana ang usa ka tinuod nga magtotoo; espirituwal nga kapadayagan sa Pulong. Kita n’yo? Ug hang-. . . “Ikaw si Simon, ug sa ibabaw niining bato, sa imong kapadayagan kung Kinsa Ako, Akong pagatukoron ang Akong Iglesia, ug ang mga ganghaan sa hades dili gayud makabuntog Niini.” Kita n’yo?

Dili ikatingala nga miingon si Simon, “Kang kinsa man kami moadto?”

Milingi si Jesus ug miingon, “Buot ba ninyo usab mobiya?”

⁵⁹ Ug miingon sila, “Ginoo, kinsa man kami, asa man kami moadto? Kay, Ikaw lamang ang aduna og mga Pulong sa Kinabuhi. Ikaw lang gayud.”

⁶⁰ Kay, dili lamang nga aduna Kaniya ang mga Pulong sa Kinabuhi, Siya mao ang Pulong sa Kinabuhi. Kita n’yo, Siya mao ang Pulong sa Kinabuhi, ug bug-os nga naila kini ni Simon. Ug sa diha nga nailhan niya kini, mao kadto ang nagpapadayon sa iyang pagkalig-on, tungod kay naipadayag kaniya nga si Jesus mao kadtoong buhi nga Pulong.

⁶¹ Karon, kana ang usa ka matuod nga magtotoo, sa diha nga ang Balaang Espiritu; dili nga nahaylo lang sa kang kinsa nga tawo, dili pinaagi sa kung unsa nga uban pa nga butang. Apan sa diha nga gipadayag kanimo sa Balaang Espiritu ang Pulong Mismo, ug nakita mong naipaklaro ang Pulong, nga gipanghimatud-an; kung ingon-ana nagaabot ang Espiritu sa Dios ug nagaanha sa niana nga kapanahonan, alang sa mao nga Pulong alang niana nga kapanahonan, ug ginapahayag kini.

⁶² Unsaon mo man pagpugong sa usa ka tawo nga motoo kang Luther kung nakahibalo siya niana? Si Luther usa ka repormador. Ang mao nga tawong-espiritu mitungha didto para sa repormasyon. Si Wesley, mao usab. Kinahanglan nga toohan nila kini. Kita n’yo, kadto mao ang—mao kadto ang mensahe alang sa maong kapanahonan sa iglesia. Mao kadto ang eksaktong nahitabo. Mao kadto kung unsa ang mamahitabo. Kinahanglan ninyong toohan kini.

⁶³ Ug ania kita karon, miabot na sa Kapanahonan sa Laodicea. Ug gitudloan kita, nga sa Kapanahonan sa Laodicea, nga si Cristo gipagawas sa Iyang iglesia; ug nagapanuktok pa gani sa pultahan, nagapaninguha nga makasulod. Busa sa dihang

makita nato nga nagakahitabo na kana, kahibalo na kita kung unsa nga kapanahonan ang atong ginapuy-an.

⁶⁴ Ug, kung ingon-ana, ania na kita sa naghinapos na nga kasaysayan sa kalibutan. Ginatapos na karon ang mao nga libro. Moabot ang adlaw nga igasulat na diha niini ang kaulahiing laray, ug isarado na kini, dayon ang panahon human na.

⁶⁵ Ug adunay ginaandam nga usa ka dakung drama. Ug aduna ang mga Manolunda ibabaw sa mga kawanangan, nga nagatan-aw. Kabalo na kamo kung unsa ang drama. Andam na ang mga magdudula. Makita ninyo sila nga ginabuhat na ang ilang bahin sa mao nga drama.

⁶⁶ Makita ninyo nga ginabuhat sa yawa ang iyang bahin. Makita ninyo ang kontrabida sa mao nga dula, kung giunsa niya pagsulod sa mao nga esena pinaagi sa iyang pagkamaliputon, aron manglimbong.

⁶⁷ Apan makita usab ninyo ang masakgaw nga Iglesia nga nagaandam na sa Iyang Kaugalingon. Usa kini ka daku nga esena. Makita ninyo ang Presensiya sa Dios nga nagapanghimatuud ug ginahimo ang maong daku nga drama nga gitagna na dinhi niining Biblia, aron idula diha mismo ang kaugalingon niini. Daw sa unsa nga panahon ang atong ginapuy-an, ang maong pinakamahimayaon nga panahon! Ang mga tawo sa tanang kapanahonan nangandoy sa niini nga panahon. Ang mga propeta kaniadto nangandoy nga makita kini nga panahon, apan wala gikatugotan.

⁶⁸ Karon, adunay usa ka magtotoo. Tungod, nakita niya kini. Gitoohan niya kini. “Nakumbinse gyud kami nga Ikaw mao ang Cristo, ang Mesias, ang Pulong sa Dios para sa niining panahon, ug among ginatoohan kana.” Kita n’yo, usa kadto ka tinuod nga magtotoo.

⁶⁹ Atong hisgotan ang pipila ka dugang pa nga mga magtotoo, sa kadali, sa dili pa kita moadto sa sunod nga lain-nga-tawo. Atong hisgotan ang propetang, si Noe. Niadtong siya, ingon tingali nga usa ka mag-uuma kaniadto, mahimong ingon niana siya sa mga panahon kaniadto, usa ka mag-uuma. Apan sa diha nga ang mga mangyuyubit ug ang mga relihiyonista niadtong panahona. . . Miabot ang iglesia sa pinakaubos nga kahimtang niini kaniadto, ug nakigsulti ang Dios kang Noe, ug gisultihan si Noe nga magbuhat siya og usa ka arka. Wala gayud si Noe nakiglalis sa Dios. Gitoohan niya Kini, nga Kadto mao ang Pulong sa Dios, ug mitrabaho dihadhiha dayon nga giandam ang mga butang.

⁷⁰ Kana ang usa ka tinuod nga magtotoo. Wala nagapakiglalis mahitungod niini. Pagbug-os gayud ka nakumbinse, mao na kana. Sama lang ni kinsa man, unsa man nga pagtoo, unsa man nga paagi. “Ang pagtoo nagagikan sa pagpatalinghug.” Kung makabarug ka dinhi, bisan unsa pa ang ingnon sa doktor nga

sakit mo! Nga, gihatag na sa mao nga tawo ang panghiling sa mao nga sakit, ug mahimo nga nahibalo gayud kung unsa ang iyang ginasulti, sumala sa mahitugot sa iyang mga instrumento ug ihibalo aron mahibaloan niya, apan ginaingon niya nga wala na'y nahibilin pa kondili kamatayon. Apan, nagaampo ka, ug nagatindog ka didto sa umalabot nga makita mo ang usa ka naayo na nga lalaki o babaye nga nagatindog didto. Oo, mao kana. Ug mao gyud kana. Molakaw sila mismo dinha sa ingon ka sigurado sama sa unsa man nga butang, tungod kay ginatoohan mo kini. Gisulti na kini sa Dios. Nahibalo ka nga ingon niana gyud kini.

⁷¹ Sama sa gamay'ng babaye nga giubo pagawas ang kanser, kita n'yo. Wala gyu'y pagduhaduha diha sa iyang hunahuna. Mahitabo gyud kadto. Namatay ang kanser, ug natangtang kini, ug mihawa kini. Kita n'yo? Mao kana. Toohan mo kini.

⁷² Sama niadtong amahan nga gidala ang gamay niya nga anak nga lalaki, dili pa lang dugay, didto. Ug ania siya karon sulod sa bilding kung asa man. Nahulog ang mao nga bata, ug nawala ang iyang memorya. Dili na siya makahinumtum sa kung unsa man. Diha sa pipila ka gutlo lamang, human sa pag-ampo, gipangutana ko siya sa iyang ngalan. Ug gisulti niya kanako kung pila na ang iyang edad, ug mao na kana siya nga ingon na ka normal sama sa kang kinsa man nga batang lalaki. Kita n'yo? Nagatoo sila. Ug pagmosulti ang Dios og unsa man, mamahimong ingon niana gyud kini.

Ug mitoo si Noe sa Dios, ug si Noe giila nga usa ka magtotoo.

⁷³ Si Daniel, sa diha nga ang iglesia kaniadto atua sa pagkabihag didto sa Babilonia, mitoo si Daniel sa Dios. Ug bisan kung giunsa pa nila pagsulti, "Mohimo kita og usa ka proklamasyon. Dili sila mag-ampo ngadto sa uban nga dios gawas niining rebulto dinha," nga iya sa niining balaang tawo, o unsa man kini. Wala kadto gihatagan ni Daniel og unsa man nga pagtagad. Nadungog niya ang Dios, kay usa siya ka propeta, ug miabot kaniya ang Pulong. Ug niadtong gihalad ang templo kaniadto, giingon niadtong, "Kung aduna ma'y tawo nga anaa sa kalisdanan sa unsa man nga nasud, ug molantaw sa niini nga direksyon paatubang sa maong balaan nga dapit, ug mag-ampo, kung ingon-ana pagadunggon Mo gikan sa Langit." Ug mitoo si Daniel sa Dios. Usa siya ka tinuod nga magtotoo, ug bisan ang mga leon dili makahimo sa pagkaon kaniya. Ug husto kana, kita n'yo, usa siya ka tinuod nga magtotoo. Aduna siya sa kung unsang butang nga tinuod ug lunsay. Usa siya ka magtotoo.

Si David, ang usa pa ka magtotoo, usa ka medyo sinalikway nga bata.

⁷⁴ Wala gipili ni Daniel nga magpakig-uban sa modernong iglesia, ni gipili usab ni Noe nga magpakig-uban sa modernong iglesia kaniadto. Wala gayud. Mga magtotoo sila sa kung unsa

ang giingon sa Dios nga mao ang Kamatuoran. Bisan unsa pa ang giingon sa modernong kalibutan kaniadto, gitooan nila kung unsa ang giingon sa Dios nga Kamatuoran. Ingon niana ang tinuod nga mga magtotoo.

⁷⁵ Sama lang sa gihimo ni Pedro, ug sa mga apostoles, nanagtoo sila nga aduna Kaniya ang Pulong sa Kinabuhi ug ang maong Pulong sa Kinabuhi. Ingon niana sa gihapon ang ginatooan ko karon. Ug ang tanang uban pa nga butang nga batok Niini sukwahi, dili kini, kamatayon kini. *Kini* lamang mao ang Pulong sa Kinabuhi, ug si Cristo mao ang Pulong.

⁷⁶ Karon, si David, usa ka mapula-pulahon nga mapiskay nga bata. Una, mahimong ginadaugdaug siya sa iyang mga igsoong lalaki, tungod nga usa siya ka gamayon nga bata. Dili siya ingon ka daku aron magsul-ob og usa ka hinagiban. Dili siya puede makig-gubat, ug hilabihan siya ka gamay ug niwang. Ug, bisan pa niana, nakaabot siya didto, ingon nga usa ka magtotoo.

⁷⁷ Ug samtang nagalingkod siya didto sa disyerto, (nga ginalantaw ang—ang pipila ka dosena sa mga karnero nga gipabantayan kaniya sa iyang amahan, dala ang usa ka iglalambuyog, didto sa usa ka lugar kon diin adunay mga leon ug mga oso ug mga lobo, ug uban pa). Misugod og lantaw si David niadtong malandong og malunhaw nga mga sibsibanan, ug nasayod siya kung daw sa unsa ka mahinungdanon alang sa usa ka karnero nga makahigda diha nianang landonganan, ug makapasilong gikan sa kainit sa adlaw; nasayod siya kung daw sa unsa ka mahinungdanon ang usa ka maayo, mabugnaw nga tubig nga mainom, sama sa giingon niya, “Ingon nga ang lagsaw nagakauhaw sa tubig sa kasapaan, ang akong kalag nagakauhaw Kanimo, Oh Dios.” Kita n’yo? Mituaw siya, nag-ampo.

⁷⁸ Ug usa ka adlaw miabot ang usa ka kalit nga hitabo, gitangag sa usa ka leon ang usa sa iyang mga karnero, ug mikalagiw dayon. Nahunahunaan niya, “Gihimo ako sa Dios nga mas labaw pa kay sa leon!” Kita n’yo? Ug gikuha niya ang iglalambuyog ug gitumba niya ang mao nga leon, pinaagi sa usa ka gamay’ng bato diha sa maong iglalambuyog. Karon, kung aduna ma’y nakakita na og usa ka leon, usa sa niining mga leon sa Aprika, daku og mabalhiboon sa liog nga mga leon nga aduna sila didto sa Palestina ug sa Asia, mahibaloan nila kung unsa gayud ang usa sa niining mga mananap. Sa diha nga, ang usa ka daku nga three hundred magnum halos dili gani makapatumba kaniya, ug gitumba niya kini gamit ang usa ra ka bato. Ug sa diha nga mibangon ang leon aron dasmagon siya, gigunitan niya kini diha sa balhibo ug gipatay kini. Mao kana ang rason nga nahibalo siya kung unsay iyang ginasulti; aduna siya’y kasinatian niini. Iya nang nasulayan ang Dios, mahitungod sa Iyang Pulong.

⁷⁹ Ug siya—wala siya nahadlok kang Goliath, tungod, nga wala kini nacircuncidahan. Dili kini usa ka magtotoo, man lang; ug sa diha nga miadto didto si Goliath ug gipanghimaraut siya sa ngalan sa mga diosdios niini.

⁸⁰ Ug si Goliath, makapilo ka higayon nga mas daku kaniya; pagkadaku kaayo nga tawo, katorse ka pulgada ang gitason sa iyang mga tudlo. Karon, ang maong mga tudlo mamahimong *ingon niana* ang katas-on, kita n'yo, katorse ka pulgada ang gitason sa maong mga tudlo, usa ka manggugubat. Ug tingali ang kotomaya nga gisul-ob niya, mahimong tulo ka gatus ka libra ang gibug-aton, o sobra pa, kita n'yo, nga gisul-ob niya. Usa ka helmet, usa usa ka dakung . . . tingali ang puthaw niini usa ug tunga ka pulgada ang kabagaon. Usa ka pagkadakung higante nga sama niana, nga nagalakaw daladala ang usa—usa ka dagum sa maghahablon nga giingon nga mga baynte ka pye ang gitason. Aduna siya'y gigunitan nga bangkaw nga baynte ka pye ang gitason. Karon unsaon man sa paghimo ni kinsa man. . . Ang tawo nga sama niana mahimong motindog lang ug mangtuhog og usa ka dosena ka mga lalaki, ug ipanglabay sila og sama *niana*, sa diha nga nagaduol sila. Makalilisang gayud nga kaaway!

⁸¹ Ug atua siya, nga nagatindog didto, nagapangandak sa iyang kaugalingon, nagapanghambog. Sa diha nga ang . . . daw sa pildi na, nakita n'yo, miingon siya, “Tugoting . . . Wala na'y kinahanglan nga magbuhis og dugo.” Miingon, “Tugoti—tugoti nga usa ka lalaki ang makig-away kanako, ug dayon kung modaug ako, kung ingon-ana magaalagad kamong tanan kanako; ug dayon kung—kung—kung modaug kamo, kung ingon-ana kami ang magaalagad kaninyo.” Kita n'yo, pagnagadahum ang yawa nga mas nakabentaha siya kanimo, kita n'yo, dinha niya gustong magpangandak. Apan ang naatubang niya dili unta kadtong tawhana. Naatubang niya ang pinakagamay'ng tawo sa nasud, bata pa, bakò-ang-abaga, mapula-pulahon nga mahimsog nga bata.

⁸² Miingon siya, “Ang buot n'yo ba ingnon kanako nga kamo, ang—ang kasundalohan sa buhi nga Dios, motindog lang dinha ug pasagdan kanang wala nasirkunsisyon nga Filistihanon nga hagiton ang kasundalohan sa buhi nga Dios?” Aba, nakurat gayud siya niini! Ngano? Ngano man? Usa siya ka magtotoo. Ang uban mga nagapatoo-too lamang. Kita n'yo? Kita n'yo, usa siya ka tinuod nga magtotoo. Miingon siya, “Kung nahadlok kamo, ako ang makig-away kaniya.” Kita n'yo? Pagkadaku nga hagit alang sa usa ka gamay nga lalaki nga sama niana! Ug busa usa siya ka magtotoo, ug gibuhat gayud niya sa eksakto kung unsa ang nahibaloan niyang pagabuhaton sa Dios. Siya'y . . .

⁸³ Sa diha nga gipanghimaraut siya niadtong wala-nasirkunsisyon nga Filistihanon sa ngalan sa mga diosdios niini, miingon kadto, “Iro ba ako; usa ka gamay lang nga ihid nga bata

ang mogawas nga sama niana? Aba,” miingon pa, “Tusukon ta ka sa tumoy sa akong bangkaw, ug ibitay ta ka dinha nianang kahoy ug ipapang-it ko sa mga langgam ang imong lawas.” Oh, sus! Oh, daw sa unsa gayud siya ka makahahadlok nga tawo!

⁸⁴ Miingon si David, “Ginatagbo mo ako gamit ang usa ka espada ug usa ka bangkaw, nga may taming pa. Ginatagbo mo ako sa ngalan sa usa ka Filistihanon. Apan, ginatagbo ko ikaw nga walay espada o bangkaw, taming, kondili ginatagbo ko ikaw sa Ngalan sa Ginoong Dios sa Israel.”

⁸⁵ Mao kana. Kana ang usa ka magtotoo. Kana ang iyang salipdanan. Kana ang iyang taming. Kana ang iyang panagang. Amen! Mao kana ang angay’ng panagang sa Iglesia. Ang si kinsa man nga magtotoo, Kana ang iyang panagang. Bisan unsa pa ang mahitabo, unsa pa’y ingnon sa kalibutan, bisan unsa pa man, ang inyong panagang mao ang Ginoong Dios sa Israel. Mao kana. “Ang Ngalan ni Jesus Cristo usa ka malig-on nga torre, ang matarung magadalagan ngadto niini ug may kaluwasan.” Kana ang atong panagang, si Jesus Cristo.

⁸⁶ Himatikdi, ug sa diha nga nahitabo kadto, nakahibalo na kita kung unsay nahitabo. Si David, walay mahimong ig-on gawas niadtong usa ka gamay nga dapit pag-ipaubos niini ang iyang—iyang—iyang pangtabon sa iyang nawong. Usa ka dapit ang ig-anan nga mao mismo dinhi sa iyang agtang. Ug sa dili pa siya makaduol sa unsa man nga distansiya sa—sa maong higante, gitudlo na sa Dios ang ig-anan sa pagpatay, ug iyang gipatay ang mao nga higante. Kita n’yo? Dios ang naghimo niini. Karon, mahimatikdan nato nga usa siya ka magtotoo.

⁸⁷ Karon, ang usa pa ka magtotoo mao si Abraham, ug gikan siya sa . . . usa ka Caldeahanon sa siyudad sa Ur. Ug gitawag siya aron buhaton ang usa ka butang nga . . . ug toohan ang usa ka butang nga tuman ka, imposible sa pisikal. “Apan wala siya magduhaduha sa saad sa Dios tungod sa kakulang sa pagtoo,” ang ginaingon sa Mga Taga-Roma 4, “kondili malig-on, nga nagahimaya sa Dios.”

⁸⁸ Sa diha nga setentay-singko na ka tuig kaniadto ang katigulangon ni Abraham, ug ang iyang asawa saisentay-singko na ang edad, ug dugay nang nagkinabuhi nga magkauban sukad niadtong bata pa sila. Igsoon niya kini sa amahan; usa ka batan-on nga lalaki ug usa ka batan-ong babaye. Ug kadto, nagkinabuhi sila nga magkauban, nga wala man lang og mga anak. Ug giingnan sa Dios si Abraham, “Ibulag ang imong kaugalingon gikan sa mga dili-magtotoo.” Kanunay nagapanawagan ang Dios og, pagbulag. “Ibulag ang imong kaugalingon gikan sa mga dili-magtotoo ug maglakaw ka uban Kanako, ug gihimo Ko ikaw nga usa ka amahan sa daghang mga nasud. Ako nang gihimo kini.”

⁸⁹ Ug gitooohan kini ni Abraham. Mao kana ang usa ka magtotoo. “Unsaon mo man sa paghimo niini, Ginoo?” wala gayud niya gipangutana ang maong pangutana. Nag-ingon na ang Dios nga buhaton Niya kini, ug mao na kini.

⁹⁰ Sa dihang milabay ang unang bulan, ug si Sarah sa gihapon. . . . Lagpas na siya kaniadto sa pag-menopos. “Aduna na ba og unsa man nga kalainan?”

“Wala ni gamay.”

⁹¹ Apan gitooohan sa gihapon kini ni Abraham. Baynte-singko ka tuig human niadto, walay kalainan sa gihapon, apan gitooohan kini sa gihapon ni Abraham. Kana ang usa ka magtotoo. Dili kana usa ka nagapatoo-too lang. Kana ang usa ka magtotoo. Baynte-singko ka tuig human niadto, nahimo si Abraham nga mas lig-on pa kay sa kung unsa siya niadtong una. “Nagtoo siya sa Dios, ug kadto giisip kaniya alang sa pagkamatarung.” Tungod kay siya nag- . . . Kana ang tinuod nga magtotoo.

⁹² Karon, ipasusi ko kaninyo taudtaod ug aron makita ninyo kung unsa kamo nga matang nahiapil.

⁹³ Karon unsa ma’y gibuhay ni Abraham? “Wala magduhaduha sa saad sa Dios,” sa mga ka-imposiblilian.

⁹⁴ Unsa ma’y buhaton sa usa ka lalaki nga setentay-singko na ka tuig ang katigulangon, uban sa usa ka asawa nga saisentay-singko na ka tuig ang edad, kung miadto man sila sa doktor ug miingon, “Gusto namo magpareserba, sa ospital. Magkaaduna kami og anak”? Ug dayon, baynte-singko ka tuig human niana, moingon, “Dok, naa pa ba sa gihapon kadtong gipareserba namo sa ospital?” Kita n’yo? Kita n’yo?

⁹⁵ Ginapalihok ka niini nga kataw-anan. Talagsaon ang imong mga pagdesisyon, alang sa kalibutan. Apan usa kini ka magtotoo, bisan kung unsa pa man kini ka talagsaon. Nag-ingon ang Biblia, nga, “Hingpit siya nga masaligon nga arang sa Dios nga tumanon kung unsa man ang giingon Niya nga pagabuhaton Niya.”

⁹⁶ Mao kana ang angay nga makab-ot sa matag magtotoo niining kahaponon. Mahimo sa Dios nga tumanon ang matag Pulong nga Iyang giingon nga pagabuhaton Niya. Dili ko igsapayan kung unsa ma’y ingnon sa mga denominasyon, mga sulti nga, “Milabay na ang adlaw sa mga milagro, ug tanan kini mga telepatiya ug tanan na, pagpanghimalad kini. Kini. . . .” Dili mahinungdanon kanako kung unsa ma’y ilang ingnon. Nagatoo ako sa gihapon. Kung kana nga pusil nakasentro sa target, maigo gayud niini ang maong target. Ug nagatoo ako nga kung ang usa ka magtotoo nakasentro sa Pulong sa Dios, pagaig-on niini ang mao sa gihapon nga butang. Kung gisaad man gyud kini sa Dios, buhaton niini kini pag-usab. Kumbensido gyud ako niana. Nga, sa diha nga makita nato nga ania na kita niini nga kapanahonan

sa diha nga kini angay nang maania, angay na gayud nga maania na kini. Angay na nga magakahitabo na kining mga butanga.

⁹⁷ Kana ang hinungdan nga nagatoo ako nga sa diha nga ang Pangasaw-onon gitawag na ug gipili, ug anaa na diha sa Libro sa Kinabuhi, magkaaduna og usa ka tingog gikan sa Langit nga magadala sa bug-os nga bautismo sa Balaang Espiritu nganha sa Pangasaw-onon nga maoy magasakgaw kaniya gikan sa yuta, diha sa usa ka Makasakgaw nga grasya. Gisaad kini sa Dios. Walay sapayan kung unsa man ka daghan nga siyensya, ug unsa pa ka daghan ang ilang napalista nga mga astronaut, ug tanang uban pa, ug pila pa ka minilyon ka milya ang mahimo nilang makita; wala ako ug unsa nga kahilambigitan bahin niana. Adunay Langit, ug adunay literal nga Jesus Cristo Didto nga magabalik diha sa porma nga lawas aron dawaton ang Iyang Iglesia ngadto sa Iyang Kaugalingon. Bisan unsa pa man ka karaan ang maong estorya, kini ang Kamatuoran sa gihapon. Mao kana ang giingon sa Dios. Kana—mao kana ang ginatoohan sa mga magtotoo.

⁹⁸ Nag-ingon ang Dios, “Ako ang Dios nga nagaayo sa tanan ninyong mga balatian. Ako mao ang Dios ug Ako walay pagkabalhin.” Amen! Ug ang Dios mao ang Pulong. Ug kung ang Dios walay pagkabalhin, unsaon man pagkabalhin sa Pulong? Kita n’yo? “Ako ang Dios, ug Ako walay pagkabalhin.” Ang Mga Kasulatan ang nagaingon niana. Ang Dios nag-ingon niini, Siya Mismo. Ug kung Siya dili mahimong mabalhin, kung ingon-ana Siya mao ang Pulong. “Sa sinugdan mao na ang Pulong, ug ang Pulong uban sa Dios, ug Dios ang Pulong.” Ang Pulong nga walay-pagkabalhin! “Ug ang Pulong nahimong unod, ug nagpuyo ipon kanato.” Amen! Oo, sir.

⁹⁹ Nagpatungha ang Dios og mga lawas, sige-sige gikan pa kang; Moises, ug Ezekiel, ug Jeremias, ug Isaias, ug kang Elias, sige-sige, kon diin temporaryo nga miabot ang Iyang Pulong. Apan ang bug-os nga Pulong nahipadayag sa niining Tawong si Jesus Cristo. Nga, Siya mao ang Dios diha sa—ang Dios nga diha sa pagkalawas nagapuyo ang bug-os kinatibuk-an sa pagka-Dios. Nahimo Siyang unod. Ginatoohan ko kana, matag Pulong.

Si Job, nga usa usab ka magtotoo.

¹⁰⁰ Usahay, ginabutang ang mga magtotoo diha sa mga pagsulay. Dili usahay; sa tanan gayud nga panahon! “Kay ang matag anak nga nagaduol sa Dios kinahanglan nga ginapanton, ginasulayan, bata nga ginabansay.” Hinumdumi, ang mga pagsulay, ang abogon nga mga dalan, ang mainit nga adlaw sa mga paglutos, apan ginadukdok sa kamatinud-anon sa inyong kasingkasing kana nga materyal hangtud nga andam na kini nga maibutang ngadto sa hulmahan. Ang mga anak sa Dios gipangbuhat sa husto diha sa Iyang Pulong, kay sila mao ang mga buhi nga ehemplo, ug nagapuyo ang Pulong sa Dios diha

kanila. Kita n'yo? Nagaabot ang mga pagsulay aron tay-ogon kamo, aron dalhon kamo sa pinaka-ilalum, para tan-awon kung asa gayud kamo magabarug. Sila gitestingan, ginasulayan ang matag anak nga nagaduol sa Dios.

¹⁰¹ Miagi si Job sa maong mga pagsulay ug mga pagtesting. Gikuha ang iyang mga anak; gikuha ang tanang uban pa. Mianha ang mga miyembro sa iglesia, giakusahan siya ingon nga usa ka makasasala sa tago lang, ug naninguha nga magsulti og tanang butang batok kaniya, apan sa gihapon ayaw niyang maminaw sa bisan unsa man niini. Nasayod siya nga natagbo niya ang mga gikinahanglan sa Dios. Nasayod siya nga dili kinahanglan nga tinguhaon pa ni Satanas nga sulayan siya. Nasayod siya nga ang yawa kadto. Ug kutob nga mapatoo siya ni Satanas nga ang Dios mao ang may kahimoan sa iyang balatian, mahimo niyang latuson si Job. Apan sa diha nga kalit nga nakuha ni Job kadto nga kapadayagan, nga dili kadto tungod sa Dios! Nagaagi lamang siya diha sa iyang mga pagsulay aron himoon siya sa kung unsang butang. Dili ang Dios ang nagahimo niadto. Si Satanas ang nagahimo niadto.

¹⁰² Ug mao man sa gihapon karon. Paningkamotan niyang isulti kaninyo nga kini nga mga pagsulay ug ingon-anang butang mao ang Dios nga nagapaninguha nga silotan kamo. Dili kini ingon niana. Dili, sir. Si Satanas kini nga nagahimo niana, ug ginapahanugotan kini sa Dios, aron hulmahon kamo; aron ipakita kaninyo kung kamo—kamo ba'y nakahigut pa niining kalibutan, sa mga kabalaka sa kalibutan, o kung ang mga bahandi ba ninyo anaa sa Langit. “Kay kung hain man ang inyong bahandi, atua usab kamo.” Husto kana. Atua ang inyong kasingkasing kung asa man ang inyong mga bahandi.

¹⁰³ Si Job, gisulayan, sa gihapon miingon siya, “Nasayod ako nga buhi ang akong Manunubos; sa kaulahiing mga adlaw motindog Siya ibabaw sa yuta. Bisan nga laglagon pa sa mga ulod sa akong panit ang akong lawas. . .”

¹⁰⁴ Nahimatikdan ba ninyo? Anaa na daan kaniya ang maong mga ulod sa panit. Ang inyong mga ulod sa panit anaa na diha kaninyo. Anaa ikaw sa usa ka selyado nga lungon nga walay unsa man nga hangin sulod niini, o unsaon pa, apan anaa na dinha daan ang maong mga ulod sa panit. Anaa ang mga niini mismo diha sulod kaninyo, ug andam ang mga niini nga tawgon aron mag-alagad sa unsa man nga oras. Hinumdumi si Caesar, giulod siya mismo didto sa dalan. Gikaon siya sa mga ulod sa panit, didto mismo sa dalan, sa kaugalingon niya mismong mga ulod sa panit. Anaa ang mga niini mismo dinha, nga andam gayud.

¹⁰⁵ “Bisan pa nga human nang laglagon sa mga ulod sa akong panit kini nga lawas, pero bisan pa niana diha sa akong unod makita ko ang Dios.” Amen! Dili ninyo mahimong hanawon kini. Bisan pa kung kaanon man kini sa mga ulod sa panit, magabalik

kini sa gihapon. “Kinsay akong makita sa akong kaugalingon. Ang akong mata mismo ang makakita, ug dili ang uban.” Iyang giingon kini, ni Job. Ngano man? Usa siya ka magtotoo. Diha sa mga pagsulay usa siya ka magtotoo. Diha sa mga paglutos, usa siya ka magtotoo. Usa siya ka tinuod nga magtotoo.

¹⁰⁶ Si Joseph, ang usa pa ka magtotoo, dili niya mapugngan kaniadto kung unsa siya. Usa siya ka propeta. Gihimo siya sa Dios nga usa ka propeta. Dili niya kaniadto gusto nga mamahimong lahi sa iyang mga igsoong lalaki, apan lahi gayud siya. Gihimo siya sa Dios kung unsa siya. Walay uban pa ang makakuha sa iyang lugar.

¹⁰⁷ Walay makakuha sa inyong lugar, bisan unsa man kini ka gamay. Moingon ka, “Usa ra man ko ka asawa sa panimalay.” Walay makakuha sa imong lugar. Ang Dios, diha sa Iyang dakung ekonomiya, gipahimutang sa ingon niana, ang Lawas ni Cristo, sa kahan-ayan, hangtud nga walay tawo ang makakuha sa imong lugar. Daw sa unsa ko ka gusto nga kuhaon ko ang lugar ni Billy Graham, si kinsa man kanato nga mga ministro, apan dili nato kini mahimo; apan, hinumdumi lang, dili usab makuha ni Billy ang atong lugar. Kita n’yo, kitang tanan adunay usa ka lugar, ang uban kanato mga ebanghelista, ang uban mga propeta, ang uban mga magtutudlo, ang uban mga pastor, unsa man kita; ang uban mga asawa sa panimalay, ang uban mga mekaniko, ang uban mga mag-uuma, unsa pa man kini, gipangpahimutang kamo sa Dios diha sa inyong lugar. Kita n’yo?

¹⁰⁸ Usa ka propeta si Joseph. Dili niya kini mapugngan tungod kay makahubad siya og mga damgo. Dili niya mapugngan tungod kay makakita gayud siya og mga panan-awon. Bantayi kung unsa siya ka matinud-anon. Bisan pa kung ang baylo niini kaniya mao ang pagkawala sa iyang pagpakig-fellowship sa iyang mga igsoong lalaki, nagmatinud-anon siya, tungod kay nagtoo siya niadtong mga damgo. Gitoohan niya kadto, ang damgo nga gidamgo niya, nga silang tanan magayukbo kaniya, ang maong mga binugkos sa trigo. Natuman kadto tungod kay gitoohan niya kadto. Usa siya ka tinuod nga magtotoo. Unsaon . . .

¹⁰⁹ Aduna pa ko’y lima ka minuto; ug napulo ka panid, himatikdi karon, himatikdi, sa Kasulatan nga nahisulat dinhi. Ang babayeng . . .

¹¹⁰ Si Natanael, usa siya ka magtotoo. Husto ba kana? Si Natanael, sa dihang nakita niya kung unsa ang nahitabo; ug may gibuhat kini kaniya, niadtong gisultihan siya ni Jesus kung kinsa siya, ug nag-ingon nga siya usa—usa ka “tinuod gayud nga Israelinhon,” ug nga “walay limbong” diha kaniya, ug gisultihan siya kung asa siya niadtong adlaw bag-o niadto, “nga nagaampo

ilalum sa usa ka kahoy.” Iya siyang nakita sa diha—sa diha nga gitawag siya ni Felipe. Usa siya ka magtotoo.

¹¹¹ Daghan ang mga nanagtindog didto, nanag-ingon, “Espiritu kini sa yawa. Ang yawa kining nagahimo sa Balaanong pagpang-ayo.” Wala sa gihapon namatay kanang karaan na nga yawa hangtud karon. Nagatoo sila nga ang yawa ang maoy nagahimo sa Balaanong pagpang-ayo.

¹¹² Miingon si Jesus, “Kung si Satanas mao man ang nagapagula kang Satanas, nabahin kung ingon-ana ang iyang gingharian, ug ang maong gingharian dili makabarug.” Kita n’yo? Miingon si Satanas, diha sa . . . Dili niya mahimo kini. Busa, dili mahimong mapagula ni Satanas si Satanas.

¹¹³ Busa usa ka magtotoo si Natanael. Ug sa diha nga nakita niya ang Pulong nga nahimong unod, gipanghimatud-an nga siya usa ka magtotoo, miingon siya, “Ikaw mao ang Rabbi, Ikaw mao ang Cristo. Ikaw mao ang Hari sa Israel.” Gitooan niya kadto.

¹¹⁴ Sa diha nga nakita kadto sa babaye didto sa atabay, gitooan niya kadto. Usa siya ka magtotoo.

Sa diha nga ang buta nga si Bartimaeus . . . Sa diha nga miagi ang usa ka babaye . . .

¹¹⁵ Ang tanan na nanaghilak kaniadto, nagapadayon lang. Ang uban kanila nagaingon, “Adunay usa ka tibuok nga . . . Nadungog kong nagpabangon Ka og mga patay. Adunay usa ka menteryo nga puno kanila dinhi; ari Ka ug pangbanhawa sila. Tan-awon namo nga ginabuhar Mo kini.” Kita n’yo, ang mao ra kadto nga yawa nga miingon, “Kung Ikaw ang Anak sa Dios, sugoa kini nga mga bato nga mamahimong mga tinapay.” Ang mao ra sa gihapon nga nagpalibot og trapo diha sa iyang nawong, gibunalan Siya sa ulo, miingon . . . gipasa ang maong bunal, ngadto sa usa’g usa, miingon, “Karon, kung masulti Mo kanamo kung kinsa ang mibunal Kanimo, motoo kami Kanimo.” Kadtong mga sundalo, kita n’yo, gihimo Siyang kataw-anan. Daw sa ang pagkalisud nga kahimtang, atua Kaniya.

¹¹⁶ Apan hinumdumi lang, kanunay nga anaa ang Dios sa esena. Kita n’yo? Anaa Siya mismo dinha nga andam, sa unsa man nga panahon.

¹¹⁷ Karon miingon si Jesus, “Mahimo Akong makigsulti sa Akong Amahan ug diretso Siyang magapadala Kanako og dose ka dakung panon sa mga Manolunda.” Oh, unsa na kaha ang mabuhar sa usa ra ka Manolunda? Kita n’yo? Apan, nakita n’yo, apan makapadala Siya og dose ka dakung panon sa sugo lamang Niya. Apan aduna Siya’y katungdan nga buhatonon. Aduna Siya’y butang nga pagabuhaton. Kinahanglan Niya nga maagihan kana.

¹¹⁸ Aduna kamo’y butang nga pagabuhaton. Aduna ang Dios og butang alang kaninyo nga pagabuhaton. Mahimong aduna kamo

og pipila ka mga kaguol ug pipila ka mga problema, mahimong aduna kamo og pipila ka mga pagkapalaw, apan nagaampo ba kita aron pagalikayan ang mga niini? Wala. “Ginoo, ipalabang ako sa mga niini, kung unsa man ang mga niini. Kung unsa man ang mga niini, dili ako ipalikay sa mga niini. Kung natagana na ang mga niini kanako, hatagi lang ako og grasya aron nga malabang kana. Kana lang.”

¹¹⁹ Karon himatikdi, ang buta nga si Bartimaeus, nahibalo siya niana. Gisulti kanila, “Kini mao kanang Propeta nga taga-Galilea. Siya ang Anak ni David. Ginatoohan namo kini.” Siguradong gisulti na kana sa pipila ka mga magtotoo kaniya. “Kaming mga magtotoo nasayod nga Siya mao ang . . . kadtong Anak ni David.”

¹²⁰ Ug nahibalo siya, nga kung Siya mao gayud, Siya mao ang Pulong. Ug kung nahibalo siya nga Siya mao ang Pulong, nahibalo usab siya nga makatugkad Siya sa mga hunahuna sa kasingkasing, busa misinggit siya, “Ikaw nga Anak ni David, kaloy-i ako.” Nagasinggit ang mga dili-magtotoo kaniadto og *ingon-niini*, ug *ingon-niana*, ang mga miyembro sa iglesia. Wala man lang kadto nakapaundang kang buta nga si Bartimaeus. Miingon siya, “Oh Jesus, Ikaw nga Anak ni David, kaloy-i ako!”

¹²¹ Tingali wala Siya makadungog kaniya. Apan nasayod Siya nga nagasinggit siya, ug mihunong Siya ug milingi. Didto ang usa ka magtotoo. Miingon Siya, “Giluwas ka tungod sa imong pagtoo.” Amen.

¹²² Giingnan Niya kadtong babaye nga may talinugo, og mao sa gihapon, “Ang imong pagtoo.”

¹²³ Tungod kay, nagsulti ang maong babaye diha sulod sa iyang kasingkasing, “Kung mahikap ko ang Iyang bisti, maayo gyud ako.”

“Ang imong pagtoo ang nagluwas kanimo.” Kita n’yo, usa ka magtotoo ang maong babaye.

¹²⁴ Mao kana sa gihapon ang nagluwas kang William Dauch, nga nagalingkod dinha, sa miaging adlaw, nga may grabe nga balatian sa kasingkasing, ug nagkaaduna og ataki sa kasingkasing, usa ka tawo nga nobentay uno na ka tuig ang katigulangon. “Giluwas ka tungod sa imong pagtoo.” Ngano man? Usa siya ka magtotoo.

¹²⁵ Si Reverend Tom Kidd dinhi, bisan paingon na sa iyang . . . halos, siguro, anaa na sa mga nobenta ka tuig karon, ang katigulangon, halos ingon niana. Ug niadtong setentay-nuebe ka tuig pa ang panuigon niya, gidala nila siya sa ospital tungod sa kanser sa prostate. Ang ingon sa doktor, “Wala na siya’y paglaum.”

¹²⁶ Apan pagsulod namo didto niadtong buntag, nakita ang maong gamay nga patriarka nga may panyolon diha sa iyang

mga abaga, nagalingkod didto, nga ginadukdok ang gamay niyang sungkod, halos wala na siya sa iyang kaugalingon. Giingnan niya ang usa ka tigulang nga babaye nga nagalingkod didto, iya siyang gitawag nga lola; kaila ko siya, usa siya sa iyang mga miyembro sa dugay nang mga katuigan. Miingon, “Daw sa ingon ka kaputi sama sa niyebe,” nga wala na sa iyang hustong panghunahuna.

¹²⁷ Pero bisan pa man, sa diha nga miabot ang Gahum sa Dios sa maong lawak, buhi siya karong gabhiona. Kana’y upat na ka tuig ang milabay. Usa ka lalaki nga halos otsenta na ka tuig ang katigulangon, ug ania siya nagalingkod karong gabhiona, nga tuman ka piskay ug ayo na, gikan sa kanser. Kita n’yo, dili usa ka nagapatoo-too lang; usa gayud ka magtotoo! Mao kana, magtoo gayud! Ginatoohan niya ang Dios sa Iyang Pulong.

¹²⁸ Sama lamang kang buta nga si Bartimaeus. Buta, apan bisan pa niana nasayod siya, nga kung makuha niya ang pagtagad ni Jesus Cristo, maangkon niya ang gusto niya.

¹²⁹ Nasayod ang maong babaye, nga kung mahikap niya ang Iyang bisti, maangkon niya kung unsay iyang gusto—maangkon niya ang gusto niya.

¹³⁰ Nasayod si Tom. Aduna siya’y pagtoo, nga kung iampo ko siya, maangkon niya ang gusto niya.

¹³¹ Dili ba kana ang mao ra nga pagtoo mao nga ingon si Martha, “Bisan karon, Ginoo, bisan unsa ang pangayoon Mo sa Dios, buhaton kini sa Dios alang Kanimo. Atua didto naghigda ang igsoon kong lalaki, nga patay na, upat na ka adlaw didto sa lubnganan; apan pangayoon Mo lang sa Dios, ug buhaton kini sa Dios alang Kanimo?”

Miingon, “Mabuhi pag-usab ang igsoon mong lalaki.”

¹³² Ug miingon siya, “Oo, Ginoo, sa kaulahiing mga adlaw, didto sa pagkabanhaw na, magabangon siya. Usa siya ka buutan nga bata.”

Miingon Siya, “Apan Ako mao ang pagkabanhaw ug ang Kinabuhi!”

“Oo, Ginoo, nagatoo ako niana, usab.”

“Asa ninyo siya gilubong?” Mao na kini. Sulbad na kini. Oo, sir.

¹³³ Ang reyna sa Habagatan motungha sa nianang henerasyon sa mga dili-magtotoo, husto kana, ug mitindog siya kaniadto ug mitoo sa iyang nakita nga mao ang Dios. Nag-ingon ang Biblia, “Magabangon siya sa kaulahiing adlaw, uban sa niana nga henerasyon, ug pagahukman kini, tungod kay gikan pa siya sa mga kinatumyan sa yuta aron sa pagpatalinghug sa kaalam ni Solomon.”

134 Si Moises usa ka magtotoo. Bisan pa nga intelektuwal siyang naninguha, gisulayan niya ang tanang pamaagi nga mahimo niya, apan wala kadto molampos. Gisulayan niya nga ipahigawas ang Israel, nahibalo siya nga tinawag siya aron buhaton kadto. Gisulayan niya ang pamaaging matematikal. Gisulayan niya ang pamaaging militar. Gisulayan niya ang pamaaging edukasyon. Gisulayan niya ang tanan nang paagi, apan wala kadto molampos. Apan human niadto gidawat niya ang pamaagi sa Dios.

135 Unsa ma'y nahitabo? Adunay Kalayo didto sa usa ka sapinit, usa ka adlaw, nga dili mapalong. Gikan didto misulti ang Pulong kaniya, ug miingon, "AKO MAN." Dili, "Ako kaniadto, o Ako sa umalabot." "AKO MAN." Ug Siya sa gihapon ang "AKO MAN." Siya mao ang Pulong, ang Eternal, walay-katapusan nga Pulong.

136 Wala magduhaduha si Moises. Ang mga kakulian batok kaniya, ang matag kinaiyahan batok kaniya, ang tanan nang butang batok kaniya. Apan, sa usa ka baliko nga sungkod nga dala niya, miadto siya didto ug gisakup ang tibuk nasud, gilumsan kini didto sa Dead Sea, ug gidala ang Israel ngadto sa yutang saad. Ngano man? Mitoo siya sa Dios. Husto. Aduna siya'y usa ka . . .

137 Kana ang magtotoo. Mahimo kitang mopabilin pa . . . Karon nagdugay ako sa akong tunga sa oras mahitungod sa mga magtotoo.

138 May duha pa ka matang. Dalion nato ang mga niini, tungod kay dili man sila importante, bisan pa. Dili.

139 Pagkahuman, ang ikaduha, ania na karon ang dili-magtotoo. Hisgotan nato ang sunod niini nga mao ang dili-magtotoo. Unsa man ang ginabuhay sa dili-magtotoo?

140 Makita nato nga ang magtotoo (nagaunsa?) nagadawat sa Pulong; sa matag kaliwat, matag henerasyon, gikan pa kang Noe, padayon hangtud sa karon. Mahimo kitang magpahigayon og unom ka bulan nga rebaybal mismo dinha niana, sa paghisgot lang sa mao nga mga tawo. Nagatoo sila. Ang magtotoo wala nagaduhaduha. Ang magtotoo nagatoo Niini, bisan kung unsa pa Kini sa pandungog o unsa man ang masulti ni kinsa man bahin Niini, bisan kung daw sa unsa pa Kini ka imposibli.

141 Ang magtotoo ginatoohan Kini, ginatoohan (ang unsa?) ang Pulong. Dili ang kredo; ang Pulong! Dili ang denominasyon; ang Pulong! Dili kung unsa ang ginaingon ni kinsa man; kung unsa gayud ang ginaingon sa Pulong! Karon, timan-i, mao kana ang magtotoo. Wala nagaduhaduha ang magtotoo. Ang magtotoo wala nagaingon, "Unsaon man pagkahitabo niini? Kung maisaysay ko man Kini!" Kana ang dili-magtotoo. Uh-huh. Ang magtotoo kini, nga, bisan pa kung unsa Kini, "Kung

ang Pulong Kini, ang Pulong gyud Kini! Matuod kana.” Kana ang magtotoo.

¹⁴² Karon ang dili-magtotoo. Karon makita nato kung unsay. . . Pagahisgotan nato ang mga dili-magtotoo. Makita nato nga okey pa sila basta nga ginapikpik sila diha sa likod ug gitawag nga mga tinun-an. Basta nga (sila) maayo pa ang tanan, okey lang sila. Apan sa diha nga kining Propeta nga gitooan nila nga usa ka propeta, ug nakahibalo nga mao gayud, nga mahimong ayohon ang mga masakiton, ug uban pa, unsay Iyang gibuhat? Sa diha nga miabot na ang Kamatuoran gayud ug ang pagpangbadlong, nga supak sa ilang mga gitooan, dili nila madawat ang Pulong.

¹⁴³ Madawat nila ang mga milagro, ug gipangbuhat nila kini. Nanagsangyaw sila ug nanagpagula og mga yawa, giwali ang Pulong, ug mga dili-magtotoo sa gihapon. Sa Mateo 10, Iya silang gisugo, nga tinagurha, ang maong setenta, ug nanagpagula sila og mga yawa, sa ingon nga nalipay si Jesus, ug miingon, “Nakita Ko si Satanas nga nahulog ingon sa kilat gikan sa Langit.” Kita n’yo, nagpagula sila og mga yawa; nga uban mismo si Judas kanila. Ania na ang mga dili-magtotoo.

¹⁴⁴ Apan sa dihadiha nga misugod na si Jesus sa pag-ingon nga Siya ingon niadto, nga Siya mao “ang pagkabanhaw,” nga Siya mao “ang Kinabuhi.” “Unsa ma’y masulti ninyo pagmakita ninyo ang Anak sa tawo nga nagakayab ngadto sa kung asa Siya gikan?”

¹⁴⁵ “Karon, ginapamilit nga ingnon niining Tawhana nga gikan kono Siya sa Langit, sobra na kana kanato. Dili nato mahimong toohan Kini.”

¹⁴⁶ Miingon Siya, “Unsa man kini? Ang unod nga inyong ginahisgotan, walay kapuslanan. Ang Espiritu ang maoy nagahatag og kinabuhi.”

¹⁴⁷ Mao na kana. Ang Espiritu ang maoy nagahatag og kinabuhi sa Pulong. Ang Espiritu, dili ang kredo. Ang Espiritu, sa Espiritu Santo, ang nagahatag og kinabuhi sa Pulong diha kaninyo, ug nagakahimong buhi, ug mao na kana, makita ninyo kini. Pinaagi og pagtoo makita ninyo kini. Nakahibalo kamo nga ingon niana kini tungod kay gisulti sa Pulong nga ingon niana kini, ug ginahatagan sa Espiritu ang Pulong og kinabuhi diha kaninyo. Mao na kana.

¹⁴⁸ Karon miingon Siya, “Unsa’y. . .” Ug sa dihadiha nga gibuhat nato kini, makaplagan nato, ang mga dili-magtotoo, pagmosulti ka og usa ka butang nga wala nila ginayonan, kalit ka na lang nila biyaan. “Basta ayaw ko!” Oh, nagakadaghan na nga nagakadaghan ang mga ingon niana, sa kalibutan karon. Mosugod ug magsulti ka lang og usa ka butang. . .

¹⁴⁹ Magtipon-tipon sila. Mahimatikdan ko diha sa mga panagtigum nga magtipon-tipon sila, daghan kaayong mga

tawo, ug motindog ka, magsugod sulti og usa ka butang. Karon, basta nga . . . Ug molingkod siya dinha, nga nagabantay lang, nagahulat lang. Dayon sa dihadiha nga pag-ingon mo, “Karon, gipaila ni Jesus Cristo ang Iyang Kaugalingon ingon nga Mesias, tungod nga usa Siya ka Propeta,” nagakapuno dayon kana nga sudlanan, atua na kini dayon nga milakaw. Usa ka tawong . . . ug milakaw na sila. Unsa man kini? Mga dili-magtotoo!

¹⁵⁰ Karon moingon kamo, “Himohimo mo lang kana.” Wala ako nagahimohimo. Ginasulti ko lang sa eksakto kung unsa ang ginasulti sa Biblia dinhi.

¹⁵¹ Dili sila mga magtotoo, ug ninggawas sila. Bisan pa nga mga tinun-an sila, apan kadto’y—supak kadto sa kung unsay . . . Miingon sila, “Kini, kinsa man ang makatoo sa usa ka butang nga sama Niana?” Kita n’yo? Sila ang mga Fariseo ug mga Saduceo nga migawas, nga nakig-uban ug mikuyog Kaniya.

¹⁵² Tungod kay, kita n’yo, sa diha nga—sa diha nga nahipakita ang supernatural, nagbunga kini og tulo ka nagkalainlain nga matang. Ingon niini ang nahitabo didto sa Egipto. Nagbunga kini og dili-magtotoo, ang magtotoo, ug ang nagapatoo-too. Nagbunga kini tanan og tulo ka matang. Gisulat ko gayud dinhi, hangtud nga mopadayon og mopadayon kita sa tibuok gabii, nga ginasaysay kini, kung ginaunsa niini. Bisan asa gayud, makita ninyo kini, makita ninyo silang tulo. Kanunay nga ingon niana kini, kita n’yo, nga makita ninyo sila.

¹⁵³ Karon bantayi, kining setenta, ninggawas sila tungod kay dili Kadto uyon sa kung unsa ang ilang gitooan nga husto.

¹⁵⁴ Wala kita’y panghunahuna nga sa ato-ato lang nagaabot. Kini mao kung unsa gayud Iyang giingon! Imong ginasalikway ang imong panghunahuna. Imo lamang ginasulti kung unsay Iyang ginasulti. Mao gayud kana ang pagpahayag. Ang *pagpahayag* nagakahulogan og “magsulti og mao rang butang.” Kung nagsulti ako nga usa ka butang ang nahitabo, ginasulti ko ang mao rang butang nga nahitabo. Mao kana kung unsa ang matuod nga pagpahayag. “Ug siya mao ang Labaw’ng Sacerdote sa atong mga pagpahayag.” Kita n’yo? Ginasulti ang mao rang butang nga gisulti sa Dios, kita n’yo, mao kana ang nagpahusto niini, tungod kay imo lamang ginasulti balik ang Pulong sa Dios.

¹⁵⁵ Karon himatikdi, ninghawa ang maong setenta. Unsay ilang gibuhar? Ug sila—ninghawa sila tungod lang nga—nga wala sila miuyon. Ang ilang—ilang—ilang kaalam, ilang—ilang pagkamiyembro sa iglesia, maoy—maoy mas mahinungdanon. Sobra kadto kaayo alang kanila nga hunahunaon, nga kining Tawhana nga nagatindog dinhi, nga ang . . . Ang tanan nang uban nga mga tawo mitoo nga gipanganak Kadto ingon nga anak sa gawas. “Wala Siya’y katungod nga tawgon ang Iyang Kaugalingon nga Dios. Ug usa lamang Siya ka tawo.” Miingon, “Wala Ka namo ginabato tungod sa maayong buhat nga Imong

ginahimo, apan among—ginabato Ka namo tungod nga Ikaw, ingon nga Tawo, ginahimo ang Imong Kaugalingon nga Dios.”

¹⁵⁶ Ug nag-ingon ang Pulong nga Siya’y Dios. “Ang Iyang Ngalan pagatawgon ‘Magtatambag,’ ‘Prinsipe sa Pakigdait,’ ‘Ang Dios nga Makagagahum,’ ‘Ang Amahan nga Walay Katapusan.’” Ang ila mismong Mga Kasulatan nga ilang ginabasa!

¹⁵⁷ Ug ang mismong adlaw nga ginakanta nila ang Salmo, ang ika-22 nga Salmo, “Dios Ko, Dios Ko, nganong gibiyaan Mo Ako? Ang tanan Kong mga bukog nagatutok sila Kanako.” “Wala ni usa ka bukog ang madugmok.” Ang mismong kanta nga ilang ginabalik-balik didto sa templo, atua nagbitay ang Halad nga ginasinggit ang mao mismong mga pulong nga gisulti ni David walo ka gatus ka tuig sa wala pa kadto, ug mga buta kaayo nga dili makita kadto.

¹⁵⁸ Ug, karon, ang mismong Dios nga nagsulti mahitungod niining kapanahonan anaa na sa esena nga eksaktong ginabuhat kung unsa ang giingon Niyang pagabuhaton Niya, ug buta sila kaayo nga dili makita kini. Kana ang mga dili-magtotoo. Manghawa sila ug moingon, “Oh, dili ako makatoo sa Ingon Nianang butanga. Wala pa gayud ako nakadungog og Ingon Niana sa akong kinabuhi!” Dili mahinungdanon kung unsa ang nadungog mo na. Ang Biblia nag-ingon nga maania Kini dinhi, ug ang Iyang Pulong kini.

¹⁵⁹ Wala pa gayud nila Kana nadungog, usab, apan sa gihapon atua Kini didto bisan pa man. Kita n’yo? Husto kana. Sila’y dili mga magtotoo.

¹⁶⁰ Sama lang ni Eva kaniadto, relihiyoso siya kaayo, siyempre, mao nga, apan siya—wala niya gitooan ang matuod nga Pulong. Ug kinahanglan nga buhatan niya ang iyang kaugalingon og usa ka relihiyon, busa naghimo siya og pipila ka mga dahon sa higuera, kita n’yo, apan wala kadto milampos. Nagakahulogan ang *relihiyon* og “usa ka pangtabon.”

¹⁶¹ Mao usab ang gibuhat ni Cain. Dili matoohan ni Cain kaniadto nga husto Kadto. Miingon siya, “Balaan ang Dios, lunsay ang Dios, ug matahum ang Dios. Busa mokuha ako og pipila ka mga bulak, ug gamiton ko ang—ang maong mga bulak ug mohimo ako og usa ka matahum, dakung halaran, ug akong—akong ipakita Kaniya ang akong paghatag og katahuran. Motindog ako sa atubangan niini, ug magayukbo ako sa atubangan Niya ug simbahan kana nga Dios. Ug magabutang ako og mga bulak sa ibabaw sa maong halaran, tungod kay, kabalo na mo, ang akong amahan ug inahan mikaon man og pipila ka mansanas, pipila ka prutas, didto sa tanaman sa Eden, ug mao kadto ang nagpagawas kanako. Ug busa, niana, mobalik ako, tungod kay himoon ko kini nga matahum. Dili mahimo nga basta na lang nga balibaran sa Dios ang akong dakung katedral.

Aba, mamahimo akong usa ka dakung katedral! Himoon ko kining pagkatahum kaayo hangtud nga makuha ko ang pagtagad sa Dios.” Si Satanas ang maong nagapuyo diha sa mga matahum. Kana ang eksaktong ginasulti sa Kasulatan.

¹⁶² Mao kana ang hinungdan, usahay, nga ang paon ni Satanas mao ang usa ka matahum nga babaye. Kung mahimo niya lang nga makuptan niya siya, makahimo siyang mangbaliko og daghan pang mga lalaki paingon sa impiyerno kay sa mahimo niya pinaagi sa tanang mga imnanan sa nasud. Husto kana. Kita n’yo? O, guwapo, usa ka bantugan nga lalaki nga dili—dili mobarug ingon nga matarung nga lalaki, pag-usab, kita n’yo, mahimo niyang dalhon sila nga mga babaye ngadto sa yawa, ug ihatud sila ngadto sa impiyerno. Oo, sir.

¹⁶³ Himatikdi, nagapuyo si Satanas diha sa mga matahum. Unsa man ang gipanguhaan niyang buhaton sa sinugdanan? Ang maghimo og mas matahum nga gingharian kay sa kang Michael; miadto didto sa Amihanan, ug giuban niya ang duha sa tulo sa mga Manolunda didto.

¹⁶⁴ Nakita n’yo kung kang kinsa—kang kinsang anak kadto kung ingon-ana, nga aduna niadtong kinaiya nga anaa kaniya? Anak ni Satanas. Sigurado, mao gayud. Karon mitukod siya og halaran, ug miluhod siya ug misimba. Gipanghimo niya ang tanan nga (si Cain) nga gihimo ni Abel.

¹⁶⁵ Apan nasayod si Abel nga dili mao kadto. Siya... Ang dugo kadto ang maoy nagpagawas kanila. Nasayod siya nga mao gayud kadto. Ang pagpakighilawas kadto, ang dugo. Busa mikuha siya og usa ka gamay’ng mananap, ug gihalad kadto ibabaw sa usa ka bato, ug gihiwa ang liog niini.

¹⁶⁶ Himatikdi si Cain, siya... giingnan siya sa Dios, miingon Siya, “Nganong dili man ka magsimba nga sama sa igsoon mong lalaki, ug mamahimo kang okey. Mamahimo kang okey kung pagabuhaton mo kana.” Apan, nagdumili, daghan kono siyang may nahibaloan na bahin niini. Kita n’yo, gisalikway niya ang orihinal, nga usa ka gipanghimatud-an nga Pulong. Kung dili ba gayud kana ang iyang mga anak sa karon! Kita n’yo?

¹⁶⁷ Karon tan-awa, “Nagpamatuod ang Dios,” ang ingon sa Biblia. Sa Mga Hebreohanon sa ika-4 nga kapitulo, o sa ika-11 nga kapitulo, “Nagapamatuod ang Dios sa iyang gasa, nga siya matarung.” Gipanghimatud-an sa Dios ang iyang halad. Gipanghimatud-an sa Dios nga kadto mao ang Iyang gidawat; kadto ang Iyang Pulong, ang Iyang plano.

¹⁶⁸ Ug giingnan si Cain, miingon, “Buhata ang mao rang butang, ug aron mabuhi.” Apan sa hunahuna ba ninyo buhaton niya, nga isalikway niya ang iyang ideya? Dili, sir. Usa siya ka dili-magtotoo, ug mitalikod siya dayon. Husto kana. Mao sa gihapon ang gibuhat ni Cain. Mao sa gihapon ang gibuhat ni Nimrod. Mga dili-magtotoo! Wala siya mitoo.

Si Beltsasar, mao sa gihapon, bisan pa man, o . . .

¹⁶⁹ Si Nabucodonosor, bisan pa man nga si Daniel ang iyang dios, gitawag niya kini nga Beltsasar, nga mao ang ngalan sa iyang diosdios, nga nakita si Daniel nga gihimo ang gamhanang mga buhat sa Dios. Ug nasayran niya niadtong tungora nga—nga mitoo si Beltsasar, o nga si Daniel usa ka dios, busa nagpahimo siya og usa ka larawan niini, ug gipatukod kini didto ug gipasimba ang tanan ngadto niini, ug uban pa. Kita n’yo, misulod ang Gentil nga gingharian nga may pagpamugos sa pagsimba sa usa ka balaan nga tawo, ug magatapos ang maong ginghariang Gentil nga may pagpamugos usab sa larawan sa usa ka balaan nga tawo, kita n’yo, mao ra sa gihapon.

¹⁷⁰ Ug aduna kaniadto og usa ka sinulat-kamot didto sa bongbong, nga dili-maila nga sinultihan, niadtong pagsugod sa Gentil nga gingharian, nga walay mahimong makabasa gawas niadtong propeta. Ug adunay sinulat-kamot sa bongbong sa karong panahon, husto kana, “Ichabod,” nga mibiya na ang himaya sa Dios sa niining mga butanga. Ug ang maong sinulat-kamot anaa na diha sa bongbong ug mabasa sa espirituhanong hunahuna nga nagatoo sa espirituhanong mga butang, nga natawo na sa Espiritu sa Dios.

¹⁷¹ Nagagawas didto ang karaang Beltsasar ug ginakuha kining mga sudlanan nga iya sa Ginoo, aron moimong og bino gamit ang mga niini. Ngano man? Usa man siya ka dili-magtotoo. Abi niya nga usa siya ka magtotoo, apan usa siya ka dili-magtotoo. Kita n’yo, mao kana, wala niya gitoohan ang Pulong.

¹⁷² Si Ahab, usa siya ka dili-magtotoo, bisan pa nga siya—naglihok siya nga daw sa dili ingon niana. Dili, dili, atua siya didto sa taliwala sa mga magtotoo, apan usa siya ka dili-magtotoo. Unsa man ang iyang gibuhat? Nakigminyo siya sa usa ka babayeng nagasimba sa diosdios, ug gidala kini nga, pagsimba ngadto sa diosdios, pasulod mismo sa Israel. Usa siya ka dili-magtotoo. Nakahibalo kita niana.

¹⁷³ Ginasalikway nila nga kamatuoran ang tibuok nga Pulong sa Dios. Ingon niana ang mga dili-magtotoo, kita n’yo, karon hinumdumi, usa siya ka hipokrito. Ug siya—nagalihok siyang ingon niana, nagaingon siya nga nagatoo siya Niini, apan iyang ginasalikway Kini. Miingon siya, “Bueno, maayo man ang halos tanan Niini.” Apan kung dili husto ang tanan niini, kung ingon-ana nagapahimo kana kaniya nga usa ka dili-magtotoo. Kinahanglan nga toohan mo ang matag tuldok ug matag kudlit, ug ang tanantanan nga gisulti Dinha. Sigurado gayud nga tinuod Kini. Kung dili Kini tinuod, kung mosulti ka karon, “Wala ako nagatoo Niana,” bueno, kung ingon-ana usa diay ka ka dili-magtotoo.

¹⁷⁴ May usa ka lalaki nga misulti kanako, usa ka higayon, usa—usa ka ministro nga miingon, “Dili ko igsapayan, Mr. Branham,

kung pila pa ka tawo ang mapakita mo nga—nga gisulti mong gipang-ayo, dili ako motoo niini.”

¹⁷⁵ Ingon ko, “Siguradong dili, dili mo mahimong toohan kini. Usa man ikaw ka dili-magtotoo. Dili man kini para kanimo. Para lang kini sa mga magtotoo.”

¹⁷⁶ Kinahanglan ninyong toohan Kini. Kita n’yo? Ug wala sila nagatoo Niini. Busa pagmay makita kamo nga usa ka tawo nga ingon niana, bueno maayo ang pagkasulti ni Pablo nga kauban sa mga propeta, nagaingon nga sila mamahimong “gahi’g ulo, hambugiro, mahigugmaon sa kalingawan labi kay sa paghigugma sa Dios; nagabaton og dagway sa pagkadiosnon, apan ginapanghimakak ang Gahum dinha, ang Gahum sa Pulong; likayi kining maong mga tawhana.” Himatikdi, ilang ginapanghimakak ang kinatibuk-an nga Pulong, apan sa tanang porma relihiyoso sila. Sila’y mga dili-magtotoo sa matuod nga Pulong, bisan pa nga mapanghimatud-an Kini.

¹⁷⁷ Sa tanang matag kapanahonan nga nangagi, gipanghimatud-an sa Dios ang Pulong sa niining mga tawo nga akong gipanghisgotan, si Noe, ug direktso hangtud kang Moises, ug sa tanang mga propeta, ug uban pa. Nagsulti ang Dios pinaagi sa mga supernatural ug gipanghimatud-an ang Pulong, ug bisan pa niana basta na lang gitalikdan Kini niadtong mga tawhana.

¹⁷⁸ Ug ania kining mga tinun-an nga nagatindog didto, silang setenta, ug ginatan-aw si Jesus nga ginabuhat ang maong mga butang nga Iyang gipangbuhat, ug nahibaloan ang Kasulatan, ug Siya nga nagasulti kanila nga mao na kadto ang kapanahonan nga kini magakahitabo. Ug dayon sa diha nga misulti Siya sa usa ka butang, “Ang Anak sa tawo! Unsa ma’y inyong isulti?” Sa diha nga misugod Siya sa pagsulti kanila mahitungod sa pagpikas-pikas og tinapay, ug uban pa, ug mipadayon nga ginasulti kanila ang mahitungod sa dagkung, espirituhanong mga butang.

Ug miingon sila, “Oh, lisud Kining sultiha!”

¹⁷⁹ Miingon Siya, “Unsa man ang inyong isulti dayon kung, ang Anak sa tawo, makita ninyo Siya nga nagakayab na ngadto sa Langit kon diin Siya gikan?” Miingon pa, “Ang unod ba kini, o ang Espiritu ba kini, nga maoy nagahatag og kinabuhi?” Kita n’yo?

¹⁸⁰ Ug dayon mipahilayo na sila, nanag-ingon, “Oh, Kana, dili, dili ko mahimong toohan Kana.” Kita n’yo? Mitalikod sila dayon, diha sa Pulong. Dili na gani sila mopabilin pa aron tan-awon kung unsa ang magakahitabo. Mao kana ang—kana ang dili-magtotoo.

¹⁸¹ Sila, unsa man ang ilang ginabuhat kung ingon-ana? Makita nato nga sila, nga kining mga tawhana, kini nga mga magtotoo, mga magtotoo kono, apan diha lang sa mga porma sa relihiyon, ug napakyas sila nga makita ang gipaila nga Kamatuoran sa

Pulong sa Dios tungod kay batok Kini sa ilang mga ginatoohan. Kita n'yo?

¹⁸² Walay mahimong kalainan kung unsa man ang imong ginatoohan, kung unsa ka man ka matinud-anon, kung unsa ka man karelihiyoso, o, wala kana ni usa man ka kahilambigitan niini. Ang pagka-sinsero, aba, wala kana og unsa man nga kahilambigitan niini. Nakakita na ako og mga tawong sinsero kaayo! Nakakita na ako og mga pagano nga ginasunog ang ilang mga anak, ginapakaon kini sa mga buaya, mga inahan uban sa ilang mga anak. Mas labaw pa kana kay sa mahimo sa usa ka Cristohanon. Kita n'yo? Sinsero silang nagatoo, mga sinsero kaayo, apan sayup nga pagka-sinsero.

¹⁸³ Moingon ang mga tawo, “Bueno, kini nga iglesia nagpadayon gayud!” Kana, sayup kamo nga pagka-sinsero, kung supak kini sa Pulong. “Bueno, karon tan-awa, wala gayud ako nagatoo sa ingon niana nga butang!” Sa dihang, nag-ingon ang Biblia nga ingon niana Kini, bisan pa man! Kita n'yo? “Wala ako nagatoo nga kinahanglan namong buhaton *Kini*.” Wala ako’y labot kung unsa man ang ginahunahuna ninyo nga dili ninyo kinahanglan buhaton. Nagsulti ang Dios nga kinahanglan nga buhaton kini.

¹⁸⁴ “Kini nga mga ilhanan maganunot kanila.” Hangtud sa asa man? “Ngadto sa tibuok kalibutan.” Kang kinsa man? “Ngadto sa tanang binuhat.” Kita n'yo, mahitabo kini! Dili nga, “Mahitabo kaha?” Mahitabo gyud kini!

¹⁸⁵ Ug kining Mensahe sa niining kapanahonan nga atong ginatagamtam, ang Presensiya sa Dios, ang kaulahiing adlaw, ang kagabhiong panahon kon diin nagadan-ag ang mga Suga, ug ang gibuksan na nga mga butang, ug ang Pulong nga gipanghimatud-an ug gipamatud-an nga mao ang Kamatuoran; parehong gipropesiya, nga nagakatuman na, tanan pinaagi sa siyensya ug sa tanan na, nagpamatuod nga Kini mao, “Si Jesus Cristo ang mao sa gihapon kagahapon, ug hangtud sa kahangturan.” Ug, usa ka tawo nga kalit lang nga talikdan Kana, siya—siya usa ka dili-magtotoo. Wala na siya’y paglaum pa. Naminhod na siya tungod sa gahum ni Satanas, busa wala na’y paglaum alang kaniya. Wala na siya’y paglaum pa.

¹⁸⁶ Karon ang unsa kadto? Ang magtotoo; karon ang dili-magtotoo; karon ang pang-ikatulo nga matang, nga atong pagahisgotan, mao ang nagapatoo-too lang. Ingon niana kanang tawhana, nagapatoo-too lang! Karon, hinumdumi, atua nagatindog ang tulo. Karon, makita nato karon, ginabuhat nila ang eksaktong ginabuhat kaniadto sa ilang amahan, si Judas.

Atua si Pedro ug ang uban pang mga apostoles, mga magtotoo.

Atua usab ang setenta, ang mga dili-magtotoo.

¹⁸⁷ Ug atua si Judas, nga nagpadayon mismo, usa siya ka nagapatoo-too. Unsa man ang ilang ginabuhat? Kini ang matang

nga nagapabilin lang hangtud nga makakaplag sila og usa ka butang, usa ka sayup diha Niini. Pirme silang nagabantay aron makakita og usa ka sayup, tan-awon kung ginaunsa kini paghimo, tan-awon kung usa ba kaha kini ka panglimbong, kung usa ba kini ka gimik lang. Nagahulat sila aron nga aduna sila'y mahisumbong. Ingon niana ang ilang ginabantayan.

¹⁸⁸ Ang dili-magtotoo, dili na gani siya maghulat pa. Gipakahimaraut niya na Kini, ug mihawa na.

¹⁸⁹ Ang magtotoo, bisan unsa pa ang mahitabo, ginatoohan niya Kini, bisan unsa pa, kay ang Pulong Kini.

Kini mao ang inyong tulo ka matang.

¹⁹⁰ Ang dili-magtotoo mohawa dayon, diha sa una pa lang nga gisulti, nga wala siya'y nagustohan bahin niini. Igsoon, igapakita niya ang iyang kolor dihaduha dayon. Usa siya ka dili-magtotoo. Miingon si Pablo, “Sila namahawa gikan kanato, tungod kay dili man sila ato, sa sinugdanan. Misugod sila uban kanato.” “Oh, maayo na man unta ang inyong pagpaningkamot; unsa man ang nag-ulang kaninyo?” Nakita ninyo kini? “Namahawa sila, tungod kay dili man sila ato.” Sa diha nga nakita nila ang Pulong nga hingpit nga nagapamuhat, aba, gusto usab nila nga makakuha og kung unsa nga matang sa gimik nga ilang magamit. Kita n'yo?

¹⁹¹ Apan ang tinuod nga mga magtotoo walay unsa man nga ginaduhaduhaan. Nahisulat Kini diha sa Pulong, ug ginatoohan nila Kini, ug nagapadayon gayud sila. Kana, mao gyud kana. Kanunay'ng, nahisulat kini. Kung wala kini nahisulat, aba, magpahilayo kamo niini, bisan unsa pa ang mahitabo. Kinahanglan nga nahisulat kini. Kita n'yo? Ug nakita nila kanang nahisulat nga Pulong ug ginatoohan nila Kini. Ug makita nila ang Dios nga nagapamuhat diha sa Iyang Pulong, makita ang maong kapanahonan, ang Mensahe, ang panahon, ug nagalakaw sila nga uban Kini.

¹⁹² Sama sa giingon ko kaganinang buntag, kung unsa nga ang tigulang nga si Pilato siguradong naglakawlakaw diha sa salog, niadtong gabhiona, nga nabalaka ang iyang konsensiya, nagapaninguha nga malimpyohan ang iyang kaugalingon. Ug miingon siya, sus, kon diin walay duhaduha nga nanawag siya tibuok gabii, miingon, “Ako—ako—akong—ako nang gihugasan ang akong kamot, tibuok gabii, ug dili ko sa gihapon masabtan. Kita mo, dili kini limpyo. Dili ko gayud mahimong tagbuon Siya; aduna ko'y Dugo sa akong mga kamot.” Oh, sus! Kita n'yo, ayaw gayud tugoti nga makasala ka og ingon niana. Kita n'yo?

¹⁹³ Kini anaa sa inyong mga kamot. Adunay usa lamang ka paagi nga matagtang ninyo Kini; kana, ang pagdawat Niini, husto kana, magmahimong kabahin Niini. Kana ang hinungdan nga giula Kini.

¹⁹⁴ Karon, ang nagapatoo-too mokuyog-kuyog ug maglihok nga ingon gayud ka relihiyoso nga mahimo niya, apan sa kinasuloran sa iyang kasingkasing nagapaninguha siya nga mahibaloan kung unsa—kung unsa, ka, kung ginaunsa mo kini paghimo. Oh, kung dili pa gayud puno ang nasud sa ingon niana nga matang, sa mga hipokrito! Oo. Usa kana ka Judas. Eksakto kana. Nagakuyog-kuyog, nahimong kabahin sa pundok; siya mao ang tesorero, kita n'yo. Nagapabilin, kanunay'ng nakatunol ang iyang kamot para sa kuwarta. Masulti ninyo nga, usa ka butang, kanunay siyang nagapangita og makuwartahan, ug nakatunol ang iyang kamot para niini. Ug usa siya ka nagapatoo-too lamang. Nagalihok siya nga sama sa usa ka magtotoo, apan sa kinasuloran sa iyang kasingkasing. . .

¹⁹⁵ Hinumdumi ninyo, dili niya mailad si Jesus. Human nga mibiya ang setenta, ug nanagbarug ang mga magtotoo; ug milingi Siya ngadto sa maong mga magtotoo, miingon Siya, “Aduna sa gihapon og usa ka butang diha kaninyo,” kay ang ingon, “Gipili Ko kamo nga dose, ug ang usa kaninyo yawa.” Nakahibalo si Jesus, sa sugod pa lang, tungod kay Siya mao ang Pulong. Nasayod Siya sa mga tinago sa kasingkasing.

¹⁹⁶ Pagkalisud gayud niadto! Paghunong sa makadiyut. Hunahunaa sa halawum, taas-taas, nga diretsahan! Siguradong malisud kaniadto alang Kaniya, nga nagalakaw mismo didto, ug may usa ka tawo nga nagatawag Kaniya nga “Igsoon,” ug nahibaloan na sa dugay nang panahon nga mao kadto ang maglilimbong nga mao ang magpaninguha nga magbudhi Kaniya, ug magbaligya Kaniya sa katloan ka buok nga salapi. Daw sa unsa kalisud nga kuptan kini diha sa Iyang dughan, ug nga Iyang higala nga nagasige'g kuyog-kuyog didto. Bisan Siya miingon, “Higala,” gitawag si Judas nga Iyang higala, “dili ba nga nakauban ninyo Ako, sa tanan niining panahon?” Nahibalo Siya diha sa Iyang kasingkasing, ug dili lang masulti kini. Nasayod Siya, gikan pa sa sinugdan, kung kinsa kadtong magabudhi Kaniya.

¹⁹⁷ Mao kana ang nagapatoo-too nga nagahulat lamang. Kantahon niya kana, nga nagaingon, “Oh, nagatoo ako *niini*, ug nagatoo ako *niini*, ug nagatoo ako *niini*. Apan, oh, kabalo mo, nadungog ko nga may usa ka tawo nga ginaingon kini sa *ingon-ani ug ingon-anang* higayon.” Oh, kita n'yo, hataas gayud ang dalunggan.

¹⁹⁸ Ang usa ka tinuod nga magtotoo wala og unsa man nga ginapaminawan gawas sa Pulong. Kana lang. Ginabantayan niya ang Pulong. Wala siya nagapangita og unsa man nga sayup. Wala siya nagapangita og unsa man nga gimik. Nagatoo siya sa Dios, ug mao na kana, ug nagapadayon lang siya. Kita n'yo? Mao kana ang magtotoo.

199 Pul-an na dayon ang dili-magtotoo diha sa usa lang ka minuto, ug dili na siya makapabilin sa napulo ka minuto aron maminaw sa Mensahe. Kinahanglan na niyang motindog ug mobiya. Supak kini sa iyang kredo, ug ayaw lang gayud niya magkaaduna og unsa man nga kahilambigitan niini, mao nga mogawas siya.

200 Dayon, ang nagapatoo-too mouban-uban mismo, kanang si Judas. Kita n'yo, kana ang maglilimbong. Kana ang—kana ang maoy tampalasan, kung kinahanglan ko nga isulti ang ingon niana nga pulong. Si Judas, nag-uban-uban siya. Kini ang panahon, usahay, nga kining mga nagapatoo-too inila kaayo ngadto sa mga tawo. Husto kana, kining maong mga nagapatoo-too, kita n'yo. Gamhanan nga mga tawo ang uban kanila, edukado, may mga degree sa pagka-doktor, dagku'g suweldo, tanan na. Bantugan nga mga tawo ang uban kanila, maliputon, sama gayud kung unsa ang mga anak ni Satanas.

201 Tan-awa kung giunsa ni Satanas pagduol mismo didto ug giuyon-uyonan ang matag gamay nga bahin niadtong Pulonga; naghulat lang siya nga makita kadtong mahuyang nga bahin ni Eva, kon diin mahipakita niya ang iyang gahum aron limbongan kini, aron malingla kini. Mao kadto—mao kadto si Satanas. Ug si Satanas dinhi, anaa diha sa porma ni Judas, niadtong kapanahonan. Mao kadto si Satanas sa nahaunang kapanahonan. Unsa man siya kaniadto? Nakig-uyon-uyon sa Pulong hangtud sa usa ka gamay lang nga butang; naninguha siya nga makakita og usa ka dapit kon diin makakaplag siya og kahuyang.

202 Ug eksaktong ingon niana mismo kung unsa ang ginapangita sa maong Judas karon. Motambong siya mismo sa mga panagtigum, ug mamantay sa palibot hangtud nga makita niya kanang gamay nga dapit nga, iyang, “Oh, mao na kini! Mao na gyud kini!” Kita n'yo? “Oh, ingon niana diay pagbuhat niana!” Kita n'yo? Eksakto gyud kana.

203 Daghan kaninyo ang makahinumdom didto niadtong gabhiona sa diha nga misaka kadtong lalaki sa entablado. Nagdahum siya nga aduna didto og pagbasa sa hunahuna bahin sa pagbasa sa mga prayer card, ug kung unsa nga abi niya nga nasakpan niya gyud kadto niadtong tungora. Igsoon, siya—nakasigurado gyud siya nga nasakpan niya kadto. Ug miduol siya. Miyembro siya sa usa ka iglesia nga wala nagatoo sa—sa—sa mga niini, sa Ebanghelyo, sa bug-os nga Ebanghelyo. Ug misaka siya didto sa entablado. Kapoy na ako niadto. Andam na sila kaniadto nga dalhon na ako palayo.

204 Sa Windsor, Ontario kadto. Didto kini, sa tabuk lang mismo gikan—gikan sa Estados Unidos, patabuk gikan sa Detroit, sa Windsor, ang dakung awditoryum.

205 Ug misaka kini nga lalaki didto nga nagsul-ob og kolor abuhon nga amerikana, ug pula nga kurbata, maalam ang hitsura sa maong tawo, maalam gayud. Miadto siya sa entablado. Ug ako. . . Miduol siya. Ug ingon ko, “Bueno, itunol mo lang kanako ang imong kamot,” Ingon ko, “Kapoy na ako; daghan na kaayong mga panan-awon ang nakita ko. Pagunita na lang ako sa imong kamot.” Ug—ug wala ko kaayong nahimatikdan ang mao nga tawo. Ug iyang gipatong ang iyang kamot ibabaw sa akong kamot. Ug miingon ko, “Sir, wala ma’y problema diha kanimo. Sige lakaw na.”

Miingon siya, “Oh, aduna, usab.”

206 Ug ingon ko, “Bueno, tan-awon ko dinha.” Ingon ko, “Wala, sir, wala ni usa man ka timailhan. Wala, sir, usa ka kamahimsog nga tawo.”

Miingon siya, “Sige tan-awa sa akong prayer card!”

207 Ingon ko, “Wala ko’y labot kung unsa man ang gibutang mo sa imong prayer card.” Ingon ko, “Wala ko og unsa man nga kahilambigitan sa maong prayer card,” nga wala ko ginahunahuna, nakita n’yo. Kapoy na ako kaniadto ug luya na. Ug ang akong. . . Apan ang grasya sa Dios, nakita n’yo, atua didto nga nagpadayon sa gihapon.

208 Timan-i ninyo, kung gipadala ka Niya, katungdanan Niya kini ang pagbantay kanimo. Dili kini akoga; Siya kini. Gipadala Niya Kini. Angay ko lang nga barugan kung unsa ang matuod.

209 Sa diha nga gisalibay ni Moises ang iyang sungkod didto, nahimo kini nga usa ka bitin, ug mao usab ang gihimo sa mga salamangkero, unsa pa man ang mahimo ni Moises kondili ang magtindog lang didto ug maghulat sa grasya sa Dios? Kana lang. Mao lang sa gihapon. Gisunod niya ang mga sugo. Ug nakahibalo na kamo kung unsay nahitabo, dili ba? Kita n’yo?

210 Miingon kining tawhana, “Karon,” miingon siya, “aduna. Tan-awa ang akong prayer card.”

211 Ingon ko, “Bueno, mahimong aduna ka’y daghang pagtoo, ug mahimong aduna gyud,” nga wala ko ginahunahuna, nakita n’yo. Nahimo kong. . . nga wala man lang gitan-aw.

212 Dayon iyang gipuwat ang butones sa iyang amerikana ug gipagawas ang iyang dughan. Miingon siya, “Tan-awa ninyo!” ngadto sa mga mananambong.

Ug hunahuna ko, “Unsa na’y nagakahitabo dinhi?”

213 Milantaw siya sa palibot. Miingon siya, “Tan-awa ninyo!” Miingon, “Nakita ninyo ang mao nga gimik?” Kadto ang inyong Judas, usa ka relihiyoso nga tawo, usa ka magwawali sa usa ka daku nga denominasyon. Miingon, “Tan-awa ninyo! Aduna ako kono og ‘dakung pagtoo.’ Karon, maluya na siya kaayo, dili na siya makabasa og hunahuna. Kita n’yo, wala na kini nagaabot kaniya.” Ug miingon siya didto, “Dili kini nga daku kaayo ang

akong pagtoo.” Miingon, “Ako kana gibutang sa akong prayer card, ug karon dili na niya kini mabasa, nakita n’yo.” Miingon, “Mao kana ang gimik!”

²¹⁴ Sa hunahuna ko, “Unsa na’y nagakahitabo?” Dayon mikanaug ang grasya sa Dios.

²¹⁵ Ingon ko, “Sir, nganong gibutang man sa yawa diha sa imong kasingkasing nga sulayan mong limbongan ang Dios?” Usa gayud ka moderno nga Judas! Ingon ko, “Usa ikaw ka church of Christ. . .” Pasayloa ko. Bueno, nasulti ko na man gyud kini. “Usa ikaw ka church of Christ nga magwawali. Miyembro ka sa church of Christ, nga gikan didto sa Estados Unidos. Ug kanang lalaki nga nagalingkod dinha nga nagsul-ob ug asul nga amerikana, ug ang imong asawa ug ang iyang asawa nga nanaglingkod dinha, naglingkod kamo atubangan didto sa usa ka lamesa kagabii nga adunay usa ka kolor berde nga butang sa ibabaw niini, usa—usa ka gibuklad nga sama *niini*, ug gidesisyonan ninyo nga kini ‘maoy pagbasa lang sa hunahuna,’ ug nga motambong kamo karong gabhiona.”

²¹⁶ Mitindog kadto nga tawo. Miingon siya, “Tinuod kana nga kamatuoran. Dios, kaloy-i ako!”

²¹⁷ Ingon ko, “Sir, ‘TB ug kanser’ ang gibutang mo sa niana nga card, ug karon anaa na kini kanimo. Sa imo na kini karon.”

Ug iya akong gigunitan sa tiilan nga bahin sa karsones, miingon siya, “Wala ko. . .”

²¹⁸ Ingon ko, “Dili ako makatabang. Sige lakaw na. Ikaw na kini ug ang Dios. Imo mismong gisulat ang imong kalaglagan diha sa imong card.” Ug kadto ang miigo kaniya. Mao gayud kadto.

²¹⁹ Kita n’yo, mga nagapatoo-too, mga maglilimbong, nagapaninguha nga makapangita og unsa man nga sayup diha sa Dios ug sa Iyang Pulong. Ingon niana ang mga Judas. Mao kana sila. Nakita n’yo kung unsa ang gidangatan ni Judas? Nakita n’yo kung giunsa pagduol niadtong lalakiha? Sa ingon nianang paagi nagakaaduna og mga nagapatoo-too. Kita n’yo, mga nagapatoo-too, oh, hataas ang edukasyon, usahay, ug usa ka dakung pagpakigsangka ang nagakahitabo tali sa Pulong ug sa ilang kredo. Ug, sa diha nga nagakahitabo kini, nanagbudhi sila para sa ilang denominasyon nga eksaktong sama gayud sa gihimo sa ilang mag-uuna, si Judas. Nagbudhi kaniadto si Judas para sa iyang denominasyon; gibaligya si Jesus, ang Pulong, para sa iyang denominasyon, ug gibudhian si Jesus Cristo human nga mipahayag siya nga kabahin siya niini.

²²⁰ Ang mga ministro usahay nagapamahayag ingon nga mga alagad ni Cristo, ug sa diha nga bug-os gipaila ang Pulong ingon nga gipanghimatud-an alang sa maong panahon, nga kini mao ang Mensahe sa kapanahonan, ug nangbudhi sila didto tungod sa popularidad, tungod sa ilang denominasyon; eksakto gayud nga sama sa gibuhay ni Judas, nga gibudhian si Jesus ngadto

sa mga Fariseo ug mga Saduceo. Wala kana nagakamatay nga espiritu, mao nga anaa kini dinha sa taliwala sa mga magtotoo, mga nagapatoo-too, ug sa mga dili-magtotoo. Kita n'yo, eksakto gayud, miadto mismo didto ug gibaligya si Jesus sa katloan ka buok nga salapi; ug daghang mga tawo ang mobuhat niini aron lang nga may makuhaan og panginabuhian, para sa dugang nga ginatus ka dolyares matag semana; husto, isalikway ang Dios nga anaa sa taliwala nila, nga nagtubos sa ilang kinabuhi, ug uban ang bug-os nga Pulong.

²²¹ Ug moingon sila, “Oh, milabay na kanang mga adlaw sa mga milagro! O, wala na nagkinahanglan ang Dios og ingon nianang butang sa karong panahon.” Kita n'yo? “Oh, nagatoo ako kang Jesus Cristo, ang Anak sa Dios! ‘Maghimaya ka Maria, inahan sa Dios, bulahan ikaw sa taliwala sa mga kababayan-an!’” Tanang uban pa niining mga butang nga ilang ginasulti! Ug ang uban kanila miingon, “Mitoo ako sa Kredo sa Mga Apostoles. Mitoo ako sa Dios nga Amahan, nga Makagagahum sa Tanan, ang Nagbuhat sa mga langit ug yuta. Mitoo ako sa balaan nga iglesiang Romano Katoliko, ug tanan niining mga butang.”

²²² Sultihi ako kung kanus-a pa nagkaaduna ang mga apostoles og kredo nga sama niana. Kung aduna man ang mga apostoles og usa ka kredo, nahisulat kini diha sa Mga Buhat 2:38, “Maghinulsol kamo ug magpabautismo, ang tagsatagsa kaninyo, sa Ngalan ni Jesus Cristo, alang sa pagpasaylo sa mga sala, ug madawat ninyo ang gasa nga Espiritu Santo.” Kung aduna ma'y kredo diha kanila, mao kini. Wala sila kaniadto og kredo. Ang Pulong kadto. Matuod kana. Nagapabilin kini nga mao sa gihapon. Kana ang reseta alang sa pag-ayo sa balatian sa kasal-anan, “Ug madawat ninyo ang gasa nga Espiritu Santo! Maghinulsol kamo ug magpabautismo alang sa kapasayloan sa mga sala, kita n'yo, ug madawat ninyo ang gasa nga Espiritu Santo.”

²²³ Apan nangbudhi sila, sama ni Judas. Mao kana ang nagapatoo-too. Ang uban kanila utokan kaayong mga tawo. Ug kining nagapatoo-too, bantayi kana nga tawo. Kana ang maliputon nga tawo. Kining gamay nga tawo nga nagakapulan dayon, ug kalit na lang motindog ug mohawa dayon, diha sa matag gamay lang nga gisulti nga wala niya nagustohan, ayaw siya hatagi og unsa man nga pagtagad; usa lang siya ka dili-magtotoo, sa sugod pa lang. Apan sa diha nga makita mo kining tawhana, ang usa ka nagapatoo-too, nga nagakuyog-kuyog, kana ang Judas. Siya kana.

²²⁴ Sama sa bantugan nga mga talento. Magahingalan ako og mga ngalan dinhi. Nga, dili ko gayud unta kini angay buhaton, apan hinganlan ko sila, bisan pa, aron nga mahibaloan ninyo kini. Sama, kang Elvis Presley, Red Foley, Ernie Ford, Pat Boone. Si Elvis Presley, usa ka Pentecostal; si Pat Boone, usa ka church of Christ; si Red Foley, nga usa ka diyakono diha sa church of

Christ; ug siguro si Ernest Ford usa ka Methodist. Ug tanan kadtong mga tawo nga aduna nianang mga talento, maalam, nga anaa diha sa telebisyon. Ug nagaingon ang mga tawo, “Bueno, dili ba nga relihiyoso man sila? Nagaawit man sila og mga alawiton.” Wala kana nagakahulogan og usa man ka butang. Oo, sir. Ginalimbongan ang kalibutan!

²²⁵ Unsa man ang ilang naangkon gikan niini? Nakakuha si Judas og katloan ka buok nga salapi. Si Elvis, usa ka panon sa mga Cadillac, ug usa ka gatus, o duha, usa ka gatus ug singkwenta ka milyon ka dolyar, o minilyon ka dolyar diha sa mga plaka ug mga butang nga sama niana. Si Pat Boone ug tanang uban pa kanila. Wala ko’y labot kung unsa man sila nga iglesia nahisakup, ug tanan na, hinipokrito kini. Usa kini ka pagpatoo-too lamang. Usa kini ka pasumangil. Nga, nagapamatuod ang ilang kinabuhi, nga dili husto. Mao gayud.

²²⁶ Dayon aduna kadtong may mga talento nga maoy maayo nga mga tig-organisa, kalibutanon nga kaalam. Ginawali nila ang Maayong Balita, ingon nila; utokan nga mga tawo, mga intelektuwal. Paminaw, ang tawo nga gihanasa sa niana nga natad, dili siya usa ka magwawali. Usa siya ka lecturer. Mao kana ang problema sa karon, aduna kita’y daghang mga lecturer.

²²⁷ Wala gayud nag-ingon si Jesus, “Lakaw kamo ug magbansay aron buhaton kini.” Miingon Siya, “Lakaw kamo nga iwali ang Maayong Balita, ug kining mga ilhanan maganunot sa maong mga pagwali.” Kita n’yo? Kita n’yo?

²²⁸ Dili kana nga makat-onan aron mamahimong usa ka lecturer nga mahimong motindog ug gayu’y, sus, butangan kini og mabulak-bulakon nga mga butang, ipabati kanimo nga daw sa nagalingkod ka mismo diha sa presensiya sa Punoan sa mga Manolunda. Dili kana ingon niini. “Nga nagabaton og mga dagway sa pagkadiosnon,” nakita n’yo, usa kana ka lecturer, dili ang Balaang Espiritu nga anaa diha sa pagpamuhat.

²²⁹ Usa ka kabus nga lalaki nga wala nakahibalo sa iyang ABC, mahimong moabot nga dala ang Gahum sa pagtoo inubanan sa Pulong; ug pabuhaton ang Balaang Espiritu og mga butang nga kadtong tawhana wala gyu’y hibangkaagan, ug dili pa gani angkonon kini. Kita n’yo? Mao kana.

²³⁰ Bantugan gayud nga mga tawo! Oo, sir. Dayon, mga tig-organisa sila. Sila’y mga mauswagon, malampuson, mga maalam sa kaalam sa kalibutan.

²³¹ Eksakto gayud sama sa gihimo ni Satanas kang Eva, kadtong luoy, mahuyang nga babaye. Miduol siya mismo kaniya ug gisulayan nga ibaligya kaniya ang ideya nga mamahimo siyang mas maalam pa kay sa kung unsa siya kaniadto, ug mao kadto ang ginapangita sa maong babaye. Imbis nga magpabilin mismo sa kung unsa ang giingon sa Pulong, siya—gusto niyang ibaligya

kaniya ang ideya nga mamahimo siyang mas maalam, ug gipalit sa maong babaye ang produkto niini. Ug mao sa gihapon nga butang ang ginahimo nila sa karon. “Ang kaalam niining kalibutana kabuangan sa Dios.” Oo, sir.

²³² Dili, sir! Oh, sus, ang mao ra gayud nga butang nga gibaligya sa mga Fariseo, ug nga gibuhat, kita n’yo, tungod sa kaalam nga nahibaloan nila. Apan—apan ilang ginasalikway ang tibuk nga Pulong sa Dios.

²³³ Niadtong gipamatud-an Kini sa husto ug gipanghimatud-an Kini ngadto kanila, ginapaninguhaan nila sa gihapon nga pangitaan og usa ka butang, ug gihunahuna nga usa Kini ka gimik. Dili sila makahimutang diha sa ilang hunahuna. Dili sila makatoo Niini. Mahimo mong isulti kanila ang unsa man nga butang, ug nagabalik na usab sila didto; mahimo mong isulti kanila ang unsa man nga butang, nagabalik na usab sila didto. Ug sila gayu’y . . . Ug dili Kini mapatuhop, nakita n’yo. Ug bantayi sila; nagahulat lang sila og usa ka higayon, usa lang ka sayup. Kana lang ang ilang gusto.

²³⁴ Mao kana kung unsa, kung dili lang kadto tungod sa grasya sa Dios, ang tanan kong kasaypanan nahibutyag na unta, kung aduna man ugaling ako. Kita n’yo? Ang grasya kini sa Dios, tungod kay walay sayup diha sa Pulong sa Dios; matul-id gayud nga Ebanghelyo. Dugay ko nang giingon, sa kang kinsa man, nga kung makita ninyo ako nga nagatudlo o nagabuhat og unsa man nga dili eksakto sa Pulong sa Dios, pagduol kamo ug sultihi ako. Ania ang butang nga nagatabon sa tanang mga sayup nga ginapaninguhaan ninyong makita. Itutok lang ang inyong mga mata Niana, ug wala kamo’y makitang mga sayup, tungod kay wala man gyud og sayup.

²³⁵ Karon hinumdumi, nagdahum si Judas nga nakakaplag siya og usa. Abi niadtong tawhana nga nakakita siya og usa. Makadaghang higayon, nga nagadahum sila nga nakakita sila og ingon niini, apan napamatud-an nga dili. Kana ang mga nagapatoo-too, mga hipokrito. Sila’y mga nobentay-singko porsyento diha sa Pulong, mao man usab si Eva kaniadto, apan, nobentay-nuebe ug siyam diha sa napulo; apan ang kadtong usa sa napulo ang nahimong hinungdan sa tanan nga kamatayon ug mga kaguol.

²³⁶ Kana ang usa ka butang nga maoy nagapakondena ngadto sa organisasyon ug sa ingon nianang mga butang, tungod kay wala nila ginadawat ang bug-os nga Pulong sa Dios. Kana ang mga nagapatoo-too. Makita nato nga dugay nang ingon niana kini, apan ginasalikway ang matuod, gipanghimatud-an nga Pulong. Aduna kanunay og ingon niana diha sa matag henerasyon. Makita nato sila sa diha nga nagasige sila og kuyog-kuyog, ug relihiyoso kaayo usab.

237 Karon, nagaandam na ako nga humanon na karon, tungod nga nahurot ko na ang dugang nga tunga sa oras.

238 Si Jesus, makita nato nga gipanghimangnoan Niya kita mahitungod niining kaulahiag nga adlaw ug batok niini nga matang sa mga tawo, nga mamahimo gayud silang sama sa mga tinuod, nga tuman gyud nilang mahimo nga limbongan ang mismong mga Pinili. Unsa man kana? Kana mao ang mga Judas, ang—ang mga tawong mahimong abton ang ingon na kahalayo. Tan-awa, sila—mahimo gani nila nga mohilak, mosinggit, nagaangkon nga nagapagula og mga yawa, tanan na, ug dayon talikdan mismo ug isalikway ang Pulong. Mao gayud. Aduna sila og dagway sa pagkadiosnon. Sila—sila—sila’y halos. . .

239 Tan-awa kung asa si Judas gikan. Misaka ang espiritu ni Judas ngadto sa Ebanghelyo, hangtud ngadto sa punto sa Pentecostes. Apan pag-abot na diha sa panahon nga mabautismohan siya diha sa Ngalan ni Jesus Cristo, ug kining uban pang mga butang nga nagauban sa bautismo sa Espiritu Santo, mihawa siya. Gipakita niya ang iyang kolor. Ug kana nga espiritu mahimong mabuhi sa sulod nianang mga denominasyon hangtud nga makadangat kini mismo sa nianang Kamatuoran, dayon nagakahagbong na kini, sama sa espiritu nga atua kanila, nga maoy nag-una sa ilang pag-abot; sama lang ni Juan nga nag-una sa pag-abot ni Jesus.

“Karon ingon mo, ‘Nag-ingon si Jesus nga mamahimo silang halos magkapareho gayud.’”

240 Karon, “Pinili,” kana ang matang nga nahisulat na ang ilang ngalan didto sa Libro, sugod pa niadtong pagkatukod, sa Kinabuhi, nga nagatoo, o pagkatukod sa kalibutan, nga nagatoo sa tibuok nga Pulong sa Kinabuhi. Kana ang mga Pinili.

241 Karon bantayi kini nga mga tawo. Karon, ginasulti ko kini nga may kataha ug pagtahod, nga may Diosnon nga paghigugma; kung dili, akong—ako—ako—ako nagkinahanglan usab og pagtawag sa altar, ako mismo. Himatikdi, nag-ingon si Jesus nga limbongan nila ang mismong mga Pinili. Karon, dili mamahimong Methodist kana, dili mamahimong Baptist kana; nasayod kita nga sila mga dili-magtotoo, sa sugod pa lang. Apan, ang organisasyong Pentecostal kini nga miapil nianang pagpang-denominasyon, nga nagbutang og ilahang utlanan, nga wala sa Pulong; ug nagbutang og utlanan ug nagtukod sa kaugalingon nilang organisasyon, ug nagparil nga dili makasulod ang Pulong. Malimbongan nila ang mismong mga Pinili, magkapareho gayud kaayo! Sama nga, “Nagahilak sila. Nagasinggit sila. Nagalukso-lukso sila. Nagapangangkon sila nga may mga panerbisyo sila sa pagpang-ayo.” Mao man usab si Judas kaniadto, ug mao usab ang gibuhat sa tanang uban pa kanila. Sa diha nga nanagsangyaw sila, mibalik nga nagkasadya

ug tanan na, ug nahisulat pa gani ang ilang mga ngalan didto sa Libro sa Kinabuhi sa Cordero.

242 Apan, hinumdumi, ang Pangasaw-onon dili—dili—dili magabangon uban nianang grupo. Mopaingon man siya sa Pagsakgaw.

243 Diha sa Paghukom, sa giandam na ang paghukom, “Ug gipamuklad ang mga libro, sa mga dautan; ug ang usa pa ka Libro, nga mao ang Libro sa Kinabuhi, gibuklad kadto,” ug atua ang Pangasaw-onon didto aron sa paghukom niini. Kita n’yo? Kita n’yo? “Usa pa ka Libro ang gibuklad, nga mao ang Libro sa Kinabuhi.” Kana ang mga karnero diha sa usa ka dapit, ug ang mga kanding sa pikas. Kita n’yo, ang mga tawo nga nangamatay kaniadto, nga wala nagkaaduna og kahigayonan, sila ang maong pagabulagon.

244 Apan karon himatikdi, “pagalimbongan” ang mismong mga Pinili, bantayi kanang grupoha. Kana ang grupo nga nagasunod-sunod mismo, “Oo, igsoon. Alleluyah! Oo. Himaya sa Dios!” Ug sa kinasuloran sa imong kasingkasing makita mo kung sa unsa ka nila gigamit; paadtoon ka sa iglesia (ngano man?) aron makahaylo og daghang mga tawo, aron nga makolektahan nila ang mga niini og matag tipik sa kuwarta nga makuha nila tungod niini. Abi ninyo wala ako nakahibalo niana? Mahimong ginahunahuna nila nga wala ako nakahibalo niini, apan nakahibalo ako niini.

245 Nakahibalo na si Jesus, sugod pa sa sinugdanan, kung kinsa ang maglilimbong. Kita n’yo? Kita n’yo? Apan unsa ma’y Iyang gibuhat? Naghulat lang Siya hangtud niadtong higayona. Mao kana ang kinahanglan natong buhaton, maghulat hangtud nianang higayona. Ayaw pagpamuhat sa kinaugalingon mo. Maghulat hangtud nianang taknaa.

246 Aduna og po-...porma, ug nagauban-uban, kana ang maliputon nga grupo. Bantayi kana nga maglilimbong, kanang grupoha dinha; dili ang—dili ang magtotoo, dili ang dili-magtotoo, apan ang kanang nagapatoo-too. Oh, sus! Unsa man ang ilang ginabuhat? Basta lang nga nagakuyogkuyog hangtud nga sa hunahuna nila may nakita na sila og usa ka butang, ginakolekta ang matag sentimo nga mahimo nilang makolekta gikan sa mga tawo, kita n’yo, ug dayon ginatigum kini didto sa niining dagkung mga organisasyon; nga tuman ka batok, ug nasayod sila niini. Kita n’yo, nakahibalo sila niini.

247 Walay kahulogan bisan unsa man ang imong isulti. Kanunay nilang ginapahimangnoan ang ilang mga tawo sa dili ka pa moabot, “Ayaw pagpaminaw Niini.”

248 Usa ka lalaki, nga mapangahason nga mitindog didto sa Ohio, niadtong bag-o ra gyud nga giayo si Igsoong Kidd, miadto didto sa entablado, ug miingon, “Karon, usa ka propeta si Igsoong Branham, wala gyu’y pagduhaduha, pag-anaa siya

ilalum sa pagdihog. Apan karon,” miingon, “pagwala na ang maong pagdihog diha kaniya,” ingon, “ayaw toohi ang iyang Pagtulon-an, tungod kay sayup Kini.”

²⁴⁹ Ug wala siya nakahibalo, nga samtang naglingkod ako sulod sa akong kuwarto, gipadayag kini kanako sa Ginoo. Ug miadto ako mismo didto. Ug daghan kaninyo ang atua didto. Miingon ako, “Nganong isulti man sa usa ka tawo ang ingon nianang butang, sa diha nga ang Pulong. . .” Karon, kita n’yo, wala gyud ako nag-ingon nga usa ako ka propeta; siya ang nag-ingon niini.

²⁵⁰ Ug ang propeta, ang pulong nga *propeta*, “magtatan-aw,” sa Daang Tug-. . . Karon, ang Iningles nga hubad sa *propeta* nagakahulogan og “usa ka magwawali.” Apan ang *magtatan-aw* sa Daang Tugon maoy usa ka tawo nga adunay “Iyaha sa Dios nga interpretasyon sa Pulong,” ug nga gipamatud-an pinaagi sa Pulong nga nagaabot ngadto kaniya ug nga makita kini daan. Mao kana kung unsa. . .

²⁵¹ Ug ang tawo nga nagasulti nga propeta ang usa ka tawo, ug dayon mosulti nga ang Pagtulon-an niini sayup? Kung dili pa kana og usa ka panguwarta lang nga pamaagi, unsa man diay kini? Haduol na gayud ang takna kon diin ang ingon niana nga butang pagawagtangon na sa esena. Oo. Apan mao kana ang matang nga, kanang nagapatoo-too, nga pikpikon ka sa likod, tawgon kang “igsoon,” nga sama gayud ni Judas. Apan, hinumdumi, nahibalo na Siya sa sinugdanan pa. Nakahibalo Siya sa gihapon. Oo, sir.

²⁵² Hinumdumi, ang tanan niining mga nagapaminaw sa niini nga teyp, usab, husto kana, anaa usab kamo sa usa sa niining mga matang. Husto gyud kana. Karon magatapos na kita. Ang matag tawo nga ania dinhi, nga nagatambong, ang matag tawo nga nagapaminaw sa niining teyp; ug bisan pa nga moabot ang adlaw nga kinahanglan ko nang mobiya niining kalibutana, kini nga mga teyp mamahimong buhi sa gihapon. Husto kana. Kita n’yo? Ug anaa kamo sa usa sa niining mga matang. Siguradong anaa gyud kamo sa usa sa mga niini. Eksakto kana. Dili kamo makalingkawas niini. Anaa kamo diha sa usa sa niining mga matang.

²⁵³ Karon unsa man? Ilha ang imong kaugalingon sa usa ka tawo diha sa Biblia nga nagtoo, kon diin nga gitooan mo ang Pulong sa diha nga gipanghimatud-an Kini, sama sa pagpamatuod ko Niini karong gabhiona, nga usa kini ka gipanghimatud-an nga Pulong sa kanunay, kanunay usab nga batok sa ginatooan sa kadaghanan.

²⁵⁴ Kung nabuhi kamo niadtong mga adlaw ni Noe, karon tugoti lang akong mangutana, unsa kaha nga dapig ang inyong gidapigan, ang dapig kaha sa iglesia o dapig kang Noe, nga propeta? Kita n’yo?

255 Kung nabuhi kamo niadtong mga adlaw ni Moises, mitoo kaha kamo sa mensahe ni Moises human nga gipamatud-an Kadto ug gipanghimatud-an sa Dios? Kondili midapig kaha kamo kang Korah ug kang Dathan, ug kanila, ug miingon, “Dili lang ikaw ang balaan nga tawo. Mahimo man sa ubang mga tawo kining mga butang nga imong ginahimo, usab?” Kita n’yo? Siguradong usa kamo sa mga niini, ug mao gyud kamo, karong gabhiona.

256 O mahimong kauban kaha kamo ni Daniel, o kauban kaha sa iglesia nga atua didto sa salu-salo ni Nabucodonosor nga ginapahinungod nila kaniadto? Kita n’yo? Mahimong didto kamo sa gawas, o didto kaha kamo sa maong mga kumbira, sa—sa maong magarbohong butang nga ilang ginapahigayon?

257 Mahimong kauban kaha kamo ni Elias, kadtong tawo nga nag-inusarang mibarug, gitawag nga, “sapoton nga tigulang, usa ka tawo nga wala na sa iyang hustong panghunahuna,” ug nagatindog siya didto sa ibabaw sa usa ka bungtod, ug nagasinaw didto ang iyang ulo tungod sa adlaw, nga ginagunitan diha sa iyang kamot ang usa ka baliko nga sungkod, ginapakaon siya didto niadtong mga langgam, uh-huh, nga usa ka tawong sapoton? O mahimong kauban kamo sa mga pari ug tanan niadtong kauban ni Jezabel didto, ug sa uban pa niadtong mga babayeng nagbisti og pang-moderno? Ug si Elias nga nagabarug didto, nga ginasaway sila, sa kutob nga mahimo niya! Sa asa kaha nga dapig mo gidala ang imong asawa? Hunahunaa lang. Ihulagway lang ang imong kaugalingon karong gabhiona.

258 Niadtong mga adlaw ni Jesus, kauban kaha kamo niining Bata nga walay kredensiyal? Wala Siya’y gipamiyembrohan nga denominasyon. Nanag-ingon sila, “Asa man Ka nga eskwelahan gikan? Wala man Ka nalista sa among rekord dinhi. Giunsa Mo man pag-angkon sa niini nga kaalam? Giunsa Mo man pagkakat-on kung wala man namo gitudlo Kanimong kining mga butanga? Asa man Ka nga eskwelahan nakatapos? Methodist Ka ba, Presbyterian, o Baptist?” Dili Siya miyembro ni usa man sa niini. Husto kana. Siya mao ang Pulong. Husto gyud kana, igsoon. Kamo ba . . .

259 O gipili kaha ninyo ang pagdapig sa mga Fariseo sa modernong tinoohan bahin sa mapainubsanon og tigulang nga pari nga daw sa pagkamalot kaayo ug buutan, ug sa organisasyon nga mitungha sugod niadtong Nicaea Council, o sukad nga giorganisa kadto ni Luther? O unsa—unsa kaha nga grupo kamo nahiapil? Atua kaha kamo sa . . . Sa unsa kaha kamo nga grupo miuban? Mibarug kaha kamo uban sa Pulong sa diha nga nakita ninyo Kining gipanghimatud-an ug napamatud-an na nganha kaninyo, nga Kini mao ang Mensahe sa maong panahon, o gipili kaha ninyo ang baruganan sa iglesia? Karon ihulagway lang ang inyong kaugalingon karong gabhiona.

²⁶⁰ Didto kaha kamo nga kauban sa mga apostoles, sa diha nga nakita nila si Jesus ug ang tanan niining makahibulongang mga butang, niadtong giduut Niya silang mga magwawali, ug miingon, “Usa kamo ka pugaran sa mga halas”? Silang mga matinud-anon, tigulang na nga mga magwawali nga nanagtuon nianang Pulong. Giingnan, “Kamo walay lain kondili nga usa ka langub sa mga tulisan, ug kamo—puno kamo sa mga bukog sa patay’ng mga tawo. Kamo walay lain kondili usa ka pinaputi lang nga bongbong.” Kita n’yo? “Kaliwat kamo sa mga bitin.” Midapig kaha kamo sa usa ka mainiton-ang-ulo nga Lalaki nga sama niana, Nga mitindog didto ug nangbadlong ug nangguba? Miingon, “Kinsa man kaninyo ang makapasangil nga Ako nakasala? Kung wala Ko ginabuhat kung unsay giingon sa Amahan. . .”

²⁶¹ Miingon sila, “Ayaw paminawa. Aduna kana nga Lalaki og espiritu sa yawa diha Kaniya. Buangbuang Siya. Kulangkulang Siya. Siya—Aduna Siya’y espiritu sa yawa diha Kaniya. Kita n’yo? Karon, ginaunsa man Niya pagbuhat niana, Siya, espiritu kana sa manghihimalad ang anaa Kaniya. Isulti ninyo, kung unsa Siya? Giburos Siya sa Iyang inahan sa wala pa gikasal ang maong inahan ug ang bana niini. Kita n’yo? Kita n’yo? Unsa man nga eskwelahan Siya gikan? Wala gani kita ni usa ka rekord mahitungod Kaniya nga naka-eskwela gayud Siya sa eskwelahan sa gramatika.”

²⁶² Ug bisan pa niana sa diha nga dose ka tuig ang Iyang panuigon kaniadto, Iyang gipatingala ug gipakaulawan ang mga pari, pinaagi sa Pulong sa Dios. Kita n’yo? Asa man Siya nga eskwelahan gikan? Ang eskwelahan sa Kahitas-an. Kita n’yo? “Pagmakita ninyo ang Anak sa tawo nga nagapanaog gikan sa kung asa Siya gikan.” Kita n’yo, mao kadto ang Iyang eskwelahan.

²⁶³ Apan midapig kaha kamo uban sa mga apostoles, sa usa ka Tawo nga sama niana, niadtong miabot ang pagpakigsangka?

²⁶⁴ O sa tinuod mihawa kaha kamo uban sa maong setenta, ug miingon, “Bueno, mobalik na lang kami sa among iglesia kung ingon niana ang Imong itudlo, nagaingon nga, Ikaw, ‘ang Anak sa tawo’? Sa dihang, bisan pa niining tanan, kinsa gyud diay Ka? Unsa gyud diay Ka? Usa lang ka tawo nga sama kanako, mikaon man ako uban Kanimo, ug paninguhaon pang isulti nga kung kinsa Ka. Gibantayan ko Ikaw. Nakita ko ang Imong kaluyahon. Nakita ko Ikaw nga mihilak. Nakita ko Ikaw nga nagabuhat og *ingon niini, ingon niana, o uban pa*. Nakita ko Ikaw nga miadto sa kamingawan uban kanamo, ug tanan nang uban pa karon nga sama niana, ug usa lang Ikaw ka tawo. Ug ingnon Mo nga mikanaug Ka gikan sa Langit. Sobra na kana para kanako.” Milakaw kaha kamo didto uban kanila? O mihawa kaha kamo uban sa setenta? O mipadayon kaha kamo nga milakaw uban sa mga apostoles ug ni Cristo?

²⁶⁵ Sa diha nga gipaningkamotan nga barugan ni San Martin ang baustismo diha sa Ngalan ni Jesus Cristo, sulod sa iglesia, sa diha nga gipaningkamotan niyang barugan ang mga ilhanan ug mga katingalahan ug ingon-anang mga butang, ug gipakahimaraut sa iglesiang Katoliko ang maong tawo ug dili man lang gani siya ilhon, ug gipalagpot siya, gipili kaha ninyo ang posisyon sa Katolikong kredo, o midapig kaha kamo kang San Martin? Sa diha nga mibalibad siya sa pagtukod niadtong tanan na nga matang sa mga rebulto sa—sa patay'ng mga tawo, ug simbahon sila, simbahon kadto nga mga rebulto, ug uban pa, sa diha nga gisalikway niya ang gipangdugang nga mga dogma, nga miingon siya, “Ang Pulong mao ang Kamatuoran!” Ug gipanghimatud-an siya sa Dios pinaagi sa dagkung mga ilhanan ug mga katingalahan, ug ang iyang mga gipanagna nangahitabo. Ug ang tanang butang nga iyang gibuhay, milakaw siya diha sa Espiritu sa Dios ug gipamatud-an kini, ug wala ni usa sa niadtong mga pari o unsa man ang may mahimo ug bisan unsa man bahin niini. Midapig kaha kamo kaniya ug miuban kang San Martin, o mipaingon kaha kamo sa kredo sa Katoliko?

²⁶⁶ Karon ang Pulong, karon ang Pulong sa Dios o ang mga dogma sa iglesia, anaa sa inyong atubangan. Pilon kaha ninyo, dawaton kung unsa ang mga dogma sa iglesia, o ginadawat kaha ninyo kung unsa ang ginaingon sa Pulong?

²⁶⁷ Hinumdumi, ingon na niana kini sa tanang mga kapanahonan sama sa kung unsa kini mismo karon. Aduna kanunay og pangkadaghanang tinoohan taliwala sa mga tawo, ug kanunay kining medyo sukwahi sa tinuod nga Pulong. Hinumdumi, dili gayud kini usa nga direktang ginasalikway Kini. Oh, dili. Ang anticristo wala nagasalikway sa Pulong. Wala gayud. Nagaingon siya nga nagatoo siya Niini, apan dili lang ang kinatibuk-an Niini diha sa paagi nga pagkasulat Niini dinhi. Kita n'yo? Kita n'yo?

²⁶⁸ Nakigsulti si Satanas kang Eva. Mitoo si Eva sa tanan Niini gawas lang niadtong gamay kaayo nga gisulti ni Satanas kaniya. Ginadawat gayud nila ang tanan Niini gawas sa usa ra gyud ka gamay. Tingali kini, “Moadto ka sa bautismohanang,” mahimo kining butang nga uban pa. Kinahanglan mong dawaton Kini, ang matag tipik, sa kung unsa gayud Kini *Dinhi*, kita n'yo, sa kung unsa gayud pagkasulti Niini *Dinhi*. Mahimong ipabuhay niini kanimo pag-usab ang pila ka nahaunang mga buhat, apan kini mao lang gayud kung unsa ang giingon sa Pulong. Dugay na kining pamaagi ni Satanas sukad nga una niyang gigamit kini diha kang Eva, ang dili toohan ang usa lang ka gamay nga bahin sa Pulong.

²⁶⁹ Ug, kanunay nga ginabulag kining tulo ka matang sa mga tawo, ang Pulong ang nagabulag sa niini nga mga tawo. Ingon na niana kini sa matag kapanahonan. Ang matag kapanahonan nga miabot, ingon na niana kini, sa diha nga mipadala ang Dios

diha sa esena og usa ka butang ug tin-aw nga ginapaila Kini, ang Iyang Pulong.

²⁷⁰ Dayon aduna kadtong mga nagatuman, nga nagapahayag nga mga magtotoo, ug magtotoo gayud sila. Aduna kadtong dili na mobalik. Nagatoo sila sa Pulong. Basta nga nagapabilin ka diha sa Pulong, ginatoohan nila Kini.

²⁷¹ Apan sa diha nga medyo supak Kini, sa kung unsay ila nang ginatoohan bisan kung giunsa pa sa Dios pagpaila Niini, moingon sila, “Buena, ako—ako—wala na ako kabalo bahin *Niana*.” Kana ang dili-magtotoo.

²⁷² O nagasunod-sunod ka lang aron tan-awon hangtud nga magkaaduna ka na og higayon sa pagsulti’g, “Uh-huh, mao na gyud kini!” Usa ka Judas aron dunggabon ang usa ka tawo sa likod, sama sa iyang gihimo. “Kabalo ko nga mogawas gyud kini, sa kadugayan. Mao na gyud!” Kana ang nagapatoo-too. Ang matag, matag gamay niini, makita nato kini diha sa Biblia.

²⁷³ Usa ka gamay nga batang lalaki usa ka higayon, dinhi dapit sa Kentucky, nga gipadaku didto sa mga kabukiran, siya—wala pa gayud siya nakaadto sa kon diin adunay espeho. Aduna sila didto og usa ka gamay ra niini nga nasab-it sa usa ka kahoy, apan wala pa gayud siya nakakita sa iyang kaugalingon. Mianhi siya sa Louisville, ingon nila, ug nagpuyo uban sa igsoong babaye sa iyang inahan. Ug nagpuyo kini nga babaye sa usa sa niining maayo nga panimalay, usa ka karaan na nga balay. Pagsulod nila didto sa usa sa—sa mga kuwarta nga adunay usa—usa ka pultahan nga may espeho sa tibuok niini, gikan sa itaas hangtud sa ubos sa maong pultahan. Kita n’yo?

²⁷⁴ Ug sa diha nga misugod na’g dagan-dagan ang maong gamay nga bata sa tibuok balay, mihunong siya. Nakita sa gamay nga Johnny si gamay nga Johnny. Kita n’yo? Ug gikatul niya ang iyang ulo, ug si gamay nga Johnny diha sa espeho mikatul usab sa iyang ulo. Mikatawa siya, ug si gamay nga Johnny diha sa espeho mikatawa usab. Milukso-lukso siya, ug si gamay nga Johnny diha sa espeho milukso-lukso usab. Kita n’yo? Miduol siya og ayo. Nagdahum siya nga usa kadto ka batang lalaki nga mahimo niyang ikadula, busa miduol siya. Direktang, gituktok niya ang espeho. Milingi siya, ug nagalantaw kaniya ang iyang mga ginikanan. Miingon siya, “Mama, ako kana.”

²⁷⁵ Karon tan-aw ka *Niini*, ug hain man ka niini? Uh-huh. Uh-huh. Asa kaha nga usa sa *niining* gamay nga mga Johnny ang imong ginaawat-awat? Hain man ka sa mga niini, nakita n’yo? Ikaw maoy usa sa mga niini.

²⁷⁶ Usa ka kanila, usa nga mobiya, sa unang depekto nga makita mo, nga gitawag mong usa ka depekto. Kita n’yo?

²⁷⁷ Sulayi kini pinaagi sa Pulong ug tan-awa kung husto ba kini, kung ginapamatud-an ba sa Pulong ang tanang butang, Kita n’yo, sulayi ninyo ang tanang butang pinaagi sa Pulong. Ingon

niana ang giingon ni Jesus. Oo, sir. “Batonan ninyo ang maayo.” Eksaktong ingon niana ang Iyang giingon.

²⁷⁸ Karon pagtan-aw diha sa espeho sa Pulong sa Dios, diha sa ubang mga kapanahonan, ug tan-awa kung asa nga grupo sa niining tulo nga mailhan kamo. Karon hunahunaa lang, kung nabuhi kamo kaniadto sa mga adlaw ni Noe, kung nabuhi kamo kaniadto sa mga adlaw ni Moises, kung nabuhi kamo kaniadto sa mga adlaw ni Jesus, o usa kanila, unsa pa man kini, hunahunaa lang kung unsa kaha kamo nga grupo mailhan. Hunahunaa ninyo kini karong gabhiona.

²⁷⁹ Dayon, ang sa karon ninyo. Karon, hunahunaa lang karon. Halawum na kini karon. Ug ayaw kini ipalagpas. Ang inyo karon mismong kahintang nagapamatuod kaninyo kung unsa nga grupo kamo nahiuban unta kaniadto. Karon, kamo ang mismong maghukom sa inyong kaugalingon, sa pagpamatuod kung unsa kamo.

²⁸⁰ Mga reverend, ministro, sa unsa kaha kamo nga grupo nahiuban sa diha nga gihimo ni Jesus kadtong pamahayag nga malisud toohan? Unsa? Unsa kaha? Human nga Siya hingpit gipaila nga Siya mao ang Pulong, kita n’yo, ug bisan pa niana, kadto nga pamahayag, wala ka pa gayud nakadungog og unsa man nga sama niana, “Ang Anak sa tawo, unsa ma’y inyong ikasulti kung Siya magakayab na ngadto sa Langit kon diin Siya gikan?”

²⁸¹ Ug miingon ka, “Bueno, nasayod gyud ako kung asa Siya natawo. Nakaila gyud ako sa Iyang papa, nakaila gyud ako sa iyang mama, ug ania Siya nga nagaingon nga magakayab Siya kono ngadto kon diin Siya gikan.” Mahimong medyo sobra na kana kaayo kanimo, dili ba, sir? Uh-huh. Medyo sobra na kana kaayo para kanimo; dili na matulon Kadto. Mahimong mao ra kini sa gihapon sa karon. Kung ingon-ana tan-awa diha sa espeho sa Pulong sa Dios ug tan-awa kung asa ka nagabarug. Oh, usa ka maglilimbong sa tawo, ayaw gayud buhata kana.

²⁸² Tan-awa, anaa kamo diha sa usa sa niining mga matang. Diha sa inyo mismong kahintang karon, ang sa karon nga kahintang sa panghunahuna, nga, kamong ania dinhi nga makita nga mga mananambong, ug kamo nga mamahimong dili-makita nga mga tigpaminaw niining teyp, ang inyo sa karon nga kahintang sa panghunahuna human sa pagpaminaw niining teyp, nagapamatuod kaninyo kung sa asa kamo nga matang. Nagasulti Kini kaninyo sa eksakto kung sa asa gyud kamo, kung magtotoo ba kaha kamo sa Pulong ug magapabilin Niini, kung mohawa ba kamo, o palungon kana nga teyp. Hmm? Kita n’yo, ginasulti niana, kung unsay inyong gihimo. Dili kamo gusto maminaw Niini, ug palungon Kini, moingon, “Dili ko gusto maminaw Niana,” kana, ingon niana ang dili-magtotoo. Kita n’yo, nagdumili ka nga mohunong aron testingan kini ug tan-

awon kung Kamatuoran ba kini o dili. Kita n'yo? O nagakuyog-kuyog lang ug ginapaninguhaan nga makakita og unsa man nga sayup Niini, kung ingon-ana nakahibalo ka na kung asa ka, usab. Ginasultihan ka Niini.

²⁸³ Dios tabangi kami nga toohan Kini ug barugan Kini, ug magmadapigon Niini, ug tumanon ang Pulong, kay Siya mao ang Pulong. Nagatoo ba kamo niana? [Nagaingon ang kongregasyon, "Amen."—Ed.]

Kita, mag-ampo kita.

²⁸⁴ Minahal nga Langitnong Amahan, daw sa unsa niini kalisud, usahay, nga isulti kining mga butanga, ug nasayod nga napulo ka linibo ka mga tawo tingali ang magapaminaw niini diha sa teyp, sa diha nga mokaylap kini sa tibuok nasud ug sa tibuok kalibutan. Apan, Minahal nga Ginoo, matuod kini, matuod gyud kini. Nagaampo ako, Ginoo, nga limpyohi una ang akong kasingkasing. Oh Ginoo, testingi ako, sulayi ako.

²⁸⁵ Tan-awa gani ako, Ginoo. Maluya ako. Ako—ako—ako... Ako'y—kapoy na ako. Ako—hago na ako. Pagaw na ang akong tutunlan. Ang akong—akong—akong mga ngabil nahimo nang—nang—nang—nang uga, medyo. Ug, ug ang akong lawas nagkaluya na, nagakatigulang na ako. Ug—ug dili na kini magkaaduna og daghang mga higayon pa, Ginoo, tingali, sa ingon ka daghan na lang nga pagtuyok sa adlaw, hangtud—hangtud ako'y—ako'y mopanaw na.

²⁸⁶ Ug karon susiha ako, karon, Amahan. Ug kung—kung aduna ma'y sayup nga butang nga ginahimo ko, ug wala nakahibalo niini, Imo—Imo lang kini ipadayag kanako, Ginoo. Imong, Imong ipakita kanako. Ako, andam ako karon nga tul-iron kini tanan.

²⁸⁷ Ginalantaw ko ang akong kaugalingon dinha sa espeho sa Pulong sa Dios. Asa kaha ako nagatindog? Makita ko ba ang akong imahe nga ginareplektar si Jesus Cristo? Mao ba kana ang persona nga akong makita diha sa maong espeho? Makita ko ba niana ang usa sa mga magtotoo sa Daang Tugon, o ang mga magtotoo sa Bag-ong Tugon? Makita ko ba ang usa ka nagapatoo-too lang? Makita ko ba ang akong kaugalingon ingon nga usa ka dili-magtotoo nga dili makapadugay ug dili maminaw sa Pulong, ug pilion hinoon ang denominasyonhong ideya? Makita ko ba ang akong kaugalingon nga nagakuyog-kuyog lang, nagapaninguha nga makakita og usa ka gamay'ng sayup?

²⁸⁸ Ginoo, kung ingon-ana man kini, basta—hinloi lang ako, Ginoo. Tugoti nga ang akong kasingkasing mamahimong limpyo ug dalisay. Tungod kay, kini akong kinabuhi, Ginoo, ako... Kini, gusto kong mahitul-id kini. Dili kinahanglan nga buhaton lang kini nga alang-alang, kung may paagi nga buhaton kini sa bug-os gayud. Ako, gusto kong matul-id kini sa husto, Amahan. Dili lang ingon niana, apan mamahimo nga mapangunahan ko

ang mga lalaki ngadto sa sayup, ug ang mga babaye ngadto sa sayup, ug ang mga tawong gimahal ko, ug nagmahal kanako; kung ingon-ana, mamahimo akong sayup.

²⁸⁹ Ug, Amahan, kung adunay unsa mang butang, kung nakapaghunahuna ako nga ang unsa man nga iglesiang denominasyon husto; o ang Council of Churches husto, kung husto ang kadaghanan sa mga tawo; Ginoong Dios, tabangi ako nga mamahimong lalaki gayud, ug Cristohanon gayud, nga angkonon ang akong kasaypanan ug magatindog dinhi ug sugoon kini nga mga tawo ngadto kon diin sa hunahuna ko nga mao ang husto. Hinloi ako. Tugoti ko nga matan-aw ug makita. Apan kung paghisgotan na kini nga mga butang, Ginoo, sa kutob niini nga makita ko, nga aduna og niadto nga mga porma ug ginasalikway ang Pulong; mahimo Mo man isulti Kini kanila, ug bisan pa niana nagaingon sila, “Bueno, wala ma’y mahimo Kini og unsa man nga kalainan. Kini. . . Wala ang Dios nagapaabot og Ingon Niana karon.”

²⁹⁰ Ginoo, nagatoo ako nga Ikaw ang mao ra sa gihapon nga Jesus. Ikaw ang mao ra sa gihapon nga Dios kung unsa Ikaw kaniadto. Dios Ka sa gihapon, ug wala Ka nagabalhin. Nagatoo ako nga kining Biblia mao ang Imong Pulong, ug nagatoo ako nga Ikaw ug ang Imong Pulong mao ra.

²⁹¹ Ug nagaampo ako, Dios, nga igahatag Mo kanamo ang Imong Balaang Espiritu, aron nga hatagan og kinabuhi ang Pulong, aron hatagan kami og Gahum nga makapabuhì; nga, moabot ang adlaw sa diha nga natapos na ang kinabuhi, ug Ikaw human na kanamo, nga pagabuhion kami ug magakayab ngadto sa Langit kon diin didto kami kaniadto, diha sa hunahuna sa Dios, sa wala pa ang pagkatukod sa kalibutan. Dios, itugot kini.

²⁹² Pasayloa ang among mga sala, Amahan. Kung aduna ma’y mga kalalaken-an o kababayen-an dinhi, nga atua nianang uban nga matang, gawas sa matuod nga mga magtotoo sa Pulong, Dios, hinloi ang ilang kasingkasing. Kung aduna ma’y nagapaminaw sa teyp, o magapaminaw pa lang, nagaampo ako alang ngadto sa paghugas sa ilang mga kasingkasing, nga Imo silang pagahinloan, Ginoo. Akong—dili ko gustong makita sila nga mangalaglag. Dios, nagaampo ako nga Imong—nga tabangan Mo kami nga masabtan nga ang usa ka sayup dili—dili gayud mahitul-id ang usa pa ka sayup. Adunay usa lamang ka paagi aron mahimo kini, kana mao ang pagtangtang sa maong duha ka sayup, ug aron mahitul-id. Ug nagaampo ako, Amahan, nga itugot Mo kana kanamo, pinaagi kang Jesus Cristo nga among Ginoo.

²⁹³ Samtang nagduko ang atong mga ulo, nagduko ang atong mga kasingkasing, karon gusto kong mohunong kamo sa pipila lang ka minuto.

²⁹⁴ Niadtong nakita ko ang panan-awon mahitungod sa impiyerno, ingon nga usa—usa pa ka batang lalaki kaniadto, ang maong kalisang niadto. Bisan pa man, mahimong sayup ako niini. Nga mahimong usa ra kadto ka pagpakita sa umalabot. Mahimong ingon niana. Wala ko kahibalo. Daw sa atua ako sa kung asa. Pagka-natural kaayo kadto.

Dayon, dili pa lang dugay kaniadto, niadtong nakita ko ang lugar sa mga gipanalanginan.

²⁹⁵ Niadtong didto ako sa mga lugar sa mga gilaglag, misiyagit ako, “Oh Dios, ayaw gayud tugoti nga mopaingon dinhi ang usa ka tawo!” Dili mo, walay pulong nga makahulagway diha kaninyo kung unsa kini ka makalilisang. Wala gyu’y paagi nga akong maihulagway dinha kaninyo. Kung nagatoo kamo nga adunay usa ka nagakalayo nga impiyerno, nga puno sa kalayo ug asupre, mamahimo nga usa—usa kana ka mas mabugnaw’ng malandong og malunhaw pa nga sibsibanan kay sa maong talan-awon nga gikahimutangan sa maong mga makalilisang nga kahintang sa niadtong mga gilaglag, ug ang kaalaot nga—nga apil sa nianang lugara.

²⁹⁶ Ug kung nasulayan ko na ang paghisgot kaninyo mahitungod sa mga butang nga lagpas na sa masabtan sa tawo, dili ko sa gihapon mahimong maihulagway kaninyo ang lugar sa mga gipanalanginan, kung daw sa unsa ka malinawon gayud! Dili na gayud mamatay, dili na gayud matigulang, dili na gayud magkabalatian; kanunay’ng batan-on, kanunay’ng himsog, ug dili na gayud mamatay; Kinabuhi nga Walay-katapusan, diha sa gipanalanginang pagkabatan-on, ug wala’y sala o bisan unsa man! Oh, wala gyu’y paagi nga ma-... maihulagway, maihulagway kini.

²⁹⁷ Bisan si San Pablo, miingon siya, “Wala makita sa mata, wala hidunggi sa dalunggan, ni misulod kini sa mga kasingkasing sa tawo,” dili mo gani kini masabtan; wala gyu’y paagi nga maihulagway kini, “kung unsa ang giandam na sa Dios alang kanila, gitagana na, alang niadtong mga nahigugma Kaniya.”

²⁹⁸ Ug karon, ingon nga siguradong tinuod gyud kini, ang parehong mga ania dinhi ug ang mga dili makita nga mga tigpaminaw, naihulagway na kita dinhi, karong gabhiona, sa usa sa niining mga matang. Kung kita man tinuod nga mga magtotoo... Sulayi kini pinaagi sa Pulong. Kung ang Pulong nagsulti sa usa ka butang, ug ang iglesia misulti og unsa man nga lahi, unsa ma’y inyong pilion? Pagtan-aw diha sa espeho sa Pulong sa Dios ug tan-awa kung hain nga matang kamo nagabarug. Ug kung wala kamo, karong gabhiona, pareho ang mga ania dinhi ug sa mga dili makita nga mga tigpaminaw, kung wala kamo, kung wala kamo diha sa nianang nagatoo nga matang, mahimo ba akong mohalad og usa lamang ka pag-ampo

alang kaninyo karon, nga mapaingon kamo sa nianang nagatoo nga matang?

²⁹⁹ Ug mahimo ba nga ipakita ninyo ang mao usab, diha sa Dios; nga nagduko ang inyong ulo, nagduko ang inyong mga kasingkasing, nakapiyong ang inyong mga mata, ug diha sa atubangan sa Dios? Usahay daw sa nahadlok lang ang mga tawo, kabalo na mo, medyo sa pagpahitaas sa ilang mga kamot, nahadlok sa ilang katapad. . . Nga, angay nga dili sila ingon niana, apan sila—angay nga andam sila nga magpabilin nga nagatindog, ug nagaingon, “Ako, sayup ako. Sayup ako.”

³⁰⁰ “Siya nga—siya nga nagatabon sa iyang sala dili mouswag, apan siya nga mosugid sa iyang sala makadawat og kalooy.” Kita n’yo? Unsa man ang *sala*? “Ang dili-pagtoo,” dili pagtoo (sa unsa?) sa Pulong.

³⁰¹ Karon, kung wala kamo sa niana nga matang, ug adunay mga butang nga—nga makita ninyo sa Biblia nga kamo gayu’y. . . diha—diha sa inyong. . . nga sa—sa inyong—inyong pagka-intelektuwal, kamo—dili ninyo makita kini. Inyo gayu’y. . . Nasayod kamo nga ingon niana ang gisulti sa Biblia, apan inyo lang. . . Dili ninyo kini masabtan, ug bisan pa niana gusto ninyo. Isulti ninyo, “Dios, tugoti nga magkaaduna ako og pagsabot. Magatuman ako Kanimo.”

³⁰² Mahimo ba ninyo nga ipataas ang inyong kamot, ug moingon, “Hinumdumi ako samtang nga nagaampo kita”? Panalanginan ka sa Dios. Panalanginan ka sa Dios. Maayo kana. Kita n’yo?

³⁰³ Sa tinuod hunahunaa gyud kini, “Aduna ba og usa ka butang diha sa Biblia nga ako—ako gayud—wala ko gayud nahibaloan? Ako—ako—akong—nahadlok ako nga makaplakan ko ang akong kaugalingon nga anaa diay diha sa usa sa maong lahi nga matang. Mahimo nga makaplakan ko ang akong kaugalingon uban sa maong setenta, nga ako. . . Aduna gyu’y pipila ka butang nga akong. . . Malisud kaayo kini kanako nga masabtan kung unsa nga—nga buhaton sa Dios kining mga butanga, kung unsa nga Siya mamahimong, kung unsa nga si Jesus mamahimong mao ra sa gihapon, kung unsa—kung unsa kining mga butanga. Ako—dili ko masabtan Kini. Gusto kong masabtan Kini. Ako—gusto kong toohan Kini. Ug, Dios, tabangi ako diha sa akong dili-pagtoo. Ako—gusto kong mamahimong kabahin Niini. Gusto ko nga mamahimong usa ka umalambit sa Pulong. Gusto kong maanaa Kini kanako.”

³⁰⁴ “Kung kamo nagapabilin Kanako, ug ang Akong Pulong nagapabilin kaninyo, kung ingon-ana managpangayo kamo sa buot ninyo.” San Juan 15. Nasayod kita nga matuod kana. Tan-awa, “Kung nagapabilin kamo,” dili nga nagasulod ug nagagawas, nagasulod ug nagagawas, kondili, “kung nagapabilin kamo Kanako,” ug Siya mao ang Pulong, “ug nagapabilin Kini kaninyo, kung ingon-ana managpangayo kamo

kung unsa ang buot ninyo ug kini igahatag kaninyo. Maangkon ninyo kini.”

³⁰⁵ “Ang nagadawat sa Akong mga Pulong, ug nagatoo Kaniya nga nagsugo Kanako, nakalabang na gikan sa kamatayon ngadto sa Kinabuhi.” Apan mahimo ba ninyong dawaton ang Pulong, usà? Mahimo ba ninyo dawaton ang Pulong, ang tibuok nga Pulong, ang kinatibuk-an ni Cristo? Si Cristo mao ang dinihogan nga Pulong. Siya mao ang Pulong, nga dinihogan.

³⁰⁶ Ang *Cristo* nagakahulogan og “ang Maong dinihogan,” ang dinihogan nga Pulong alang sa maong panahon, nga naipahayag, ang Manluluwas, ang Manunubos. Kana maoy kon kanus-a Siya nagaabot, ug Siya mao kangang dinihogang Persona nga magatuman sa nianang puwesto.

³⁰⁷ Karon kini mao ang Balaang Espiritu sa kaulahiing mga adlaw, nga magapadan-ag sa pang-gabii nga mga Kahayag, nga ginabalik ang Pagtoo nga dugay nang gitamaktamakan, sa mga denominasyon; nga ginakondena ang mga denominasyon ug nagabalik ngadto sa orihinal nga Pagtoo, uban sa orihinal nga pang-Biblia nga Pagtoo; sa orihinal nga Biblia, nga ginatoohan ang matag Pulong Niini, dili nga ginadugangan kini ug ginapasulti Kini og *ingon niini* ug ginapasulti og *ingon niana*. Ginasulti lang Kini sa paagi nga gisulti Niini, ug gusto ninyong toohan kini sa ingon nianang paagi.

³⁰⁸ Aduna ba’y usa nga wala pa nahipataas ang ilang mga kamot, nga gustong ipataas ang ilang mga kamot, ug moingon, “Dios, hinumdumi ako?”

³⁰⁹ Panalanginan ka sa Dios, gining. Panalanginan ka sa Dios, batan-ong babaye. Panalanginan ka sa Dios. Maayo. Panalanginan ka sa Dios, gamay’ng bata. Panalanginan ka sa Dios, igsoon kong babaye. “Gikinahanglan ko Siya.” Ug panalanginan ka, igsoong babaye, sa akong tuo nga dapit. Ug panalanginan ka, diha sa likod. “Gusto ko . . .” Ug panalanginan ka sa Dios, batan-ong lalaki. Ug ikaw, igsoong babaye, dinhi dapit. Ikaw, igsoong lalaki, sa niining pikas nga kilid, panalanginan ka sa Ginoo. Panalanginan ka sa Dios diha sa likod. “Hinumdumi lang ako, Ginoo.”

³¹⁰ Karon timan-i, wala ninyo ginapataas ang inyong kamot nganhi kanako; ngadto gayud Kaniya. Sa mismong likuran ko, karon, nakita sa Ginoo ang imong kamot. Bisan wala ko kini nakita, nakita Niya kini. Nasayod Siya sa imong kasingkasing. Nakahibalo Siya kung sa unsa ang ginapitik niana. Nakahibalo Siya sa imong katuyoan. Nasayod Siya kung unsa ang imong tumong sa nianang katuyoan. Panalanginan ka sa Dios, igsoon.

³¹¹ Aduna pa ba, “Gusto kong toohan ang tibuok nga Pulong.” Panalanginan ka sa Dios. Sige. Panalanginan ka sa Dios. “Tabangi ako, Ginoo, tabangi ako.” Nakita sa Ginoo ang inyong mga kamot. Oo, sir. Mao kana. “Adunay mga butang nga akong—

dili ko masabtan. Ako—dili ko gusto nga mamahimong usa ka dili-magtotoo. Bisan pa nga dili ko masabtan ang mga niini, gusto kong toohan kini, sa gihapon. Andam na akong moingon, ‘Ginoong Dios, ania ako. Gusto kong motoo. Tabangi ako diha sa akong dili-pagtoo, Ginoo.’” Magauban ang Dios kaninyo. Panalanginan kamo sa Dios. Daghan, daghang mga kamot ang nahipataas, ug mga nagapataas pa.

³¹² Moingon ka, “Igsoong Branham, makatabang ba kana?” Ipataas lang ang imong kamot sa makausa, inubanan sa usa ka tinuod, hustong katuyoan, ug makita mo kung unsa ang bation mo niini.

³¹³ Nagpamatuod kamo nga adunay usa ka gamay nga butang diha sa inyong kinabuhi, nga nasayod kamo. Adunay usa ka gamay’ng butang, dili ninyo gusto nga maanaa kini dinha, apan anaa kini dinha, bisan pa man. Nagahunahuna kamo kung unsaon niini pagbuhat. “Ug, Ginoo, ayaw itugot nga mamahimo akong usa ka Judas. Ayaw tugoti nga magkuyog-kuyog lang ako diha—diha sa Mensahe, nagasulay sa paghunahuna nga tingali moabot ang adlaw nga adunay mogawas nga pipila ka gamay’ng depekto. Oh Dios, dili ako. Tugoti akong magpabilin mismo sa Imong Pulong. Kita n’yo? O tingali mamahimo akong usa ka dili-magtotoo nga nagahunahuna lang, ‘Bueno, kung—kung. . .bueno, nganong dili man isulti sa tanang uban pa kanila ang ingon niana?’ Kita n’yo? Ako—dili ko usab gusto nga mamahimong ingon niana. Gusto kong mamahimong usa ka magtotoo. Gusto ko. Makita ko ang Pulong sa Dios sa niining kapanahonan. Makita ko ang Dios diha Niini. Ug, Ginoo, himoa akong kabahin sa niana nga Pulong. Himoa akong kabahin Niini. Gusto ko nga mamahimong kabahin Niini.” Panalanginan kamo sa Ginoo.

³¹⁴ Karon magaampo kita. Ug ang matag tawo, mag-ampo kamo alang—alang sa inyong kaugalingon, ug magaampo ako alang kaninyo. Nahibaloan ba ninyo, usa ka adlaw mopaingon kita sa. . .dili kita mamahimong magkauban dinhi, tingali, sa makadiyut lang nga panahon. Ang uban kanato pagakuhaon na, ug dili kita mamahimong magkauban. Adunay daghan kanato dinhi, kon diin, ang pipila kanato nagakatigulang na. Ang uban kanato, wala kita nakahibalo. Bisan ang mga batanon nagakamatay. Nagakamatay kita diha sa unsa man nga edad. Siguradong magbinulagay gyud kita, ug kinahanglan nga maihusay kini nga butang. Ug dili kamo makaadto didto nga nagapamasin lang, kinahanglan kamong magduol samtang nga anaa pa kamo sa inyong hustong panghunahuna.

³¹⁵ Moingon ka, “Bueno, sa dili pa gayud ako mamatay, kung makita ko Kini.” Ayaw, ayaw buhata kana. Basin wala ka na gani diha sa imong hustong panghunahuna nianang tungora. Mahimong mapatay ka sa dili ka pa makapauli, diha sa usa ka aksidente. Mahimo kang mamatay diha sa usa ka ataki sa

kasingkasing. Wala kita nakahibalo kung unsa ang mahitabo; ang Dios lamang ang nagkaput niana. Nagasalig ako nga dili unta.

³¹⁶ Nagalantaw ako sa mga tawo diha sa gawas, usab, nga gipataas ang ilang mga kamot diha sa bintana. Kita n'yo? Oo, panalanginan kamo sa Dios.

³¹⁷ “Ako—gusto kong—gusto kong mahitul-id. Ako—ako—ako—gusto kong mahitul-id.” Ug karon atong tul-iron kini mismo, karon, karon mismo. Basta, mahimo ninyong himoon kini diha sa usa ra ka higayon, nga gikan sa kinasuloran sa inyong kasingkasing, kung sinsero kamong moingon, “Ginoong Jesus, bisan unsa pa man kini, o unsa man ang isulti ni kinsa man, ang Imong Pulong mao ang mamahimong una sa akong kinabuhi. Gusto ko Kini diha sa akong kinabuhi. Ikaw mao ang Pulong. Ingon niana ang giingon sa Biblia, ug nagatoo ako nga ang Biblia mao ang Pulong sa Dios. Ug nasayod ako nga ang mga kredo ug mga dogma, nga gidugang ngadto Niini, ang nagpahimo Niini nga usa ka hugpong sa pagpakaaron-ingnon. Ginoo, hinloi ako gikan sa nianang butang nga sama niana, ug tugoti nga mamahimo akong bug-os nga Imoha. Akong ginapataas ang akong mga kamot nganha Kanimo. Akong ginapataas ang akong kasingkasing nganha Kanimo, ang akong tingog nganha Kanimo, ang akong pag-ampo nganha Kanimo. Dios, magmaloloy-on Ka kanako.”

³¹⁸ Ug ang akong mga kamot nahipataas, usab, Ginoo. Hinloi ako, Oh Ginoo, gikan sa tanan nga dili-pagtoo.

³¹⁹ Bisan nga mahimong dili Niya ihatag kanako ang—ang Gahum sa paglakaw nga sama ni Enoch kaniadto ug nga dili kinahanglan mamatay, kondili ang magkaaduna lamang og usa ka paglakaw sa hapon ug Makapauli nga uban Kaniya; apan, Dios, nagatoo ako nga mahitabo kini, tungod kay nasayod ako nga magkaaduna og usa ka Pagsakgaw diha sa kaulahiang adlaw, ug pamub-an na ang buluhaton.

³²⁰ Ug, Amahan, ingon niana ang ginasulti sa among kalendaryo, trayntay-sais pa ka mga tuig ug matapos na ang buluhaton, ug kinahanglan Ka nang moabot sa usa ka panahong sulod niana o wala na'y tawo nga maluwat. Ug dayon naingnan kami, sa mga kronolohista ug sa—ug sa mga tawo nga nagasusi sa ingon nianang mga butang, nga kami tuman na ka nag-uswag sulod sa daghan, daghang mga tuig sugod niana, daghang mga katuigan nga nag-una na. Ginasultihan nila kami, diha sa mga kalendaryo, nga tuman kami ka mas nauna kay sa niana; tingali adunay kinse o baynte na lang ka tuig ang nahibilin. Wala ko kabalo, Amahan. Apan ang nahibaloan ko, nga bisan nga sumala sa among kalendaryo, halos anaa na kami dinha.

³²¹ Makita kong wala na'y nahibilin og unsa man nga paglaum, Ginoo. Adunay nagasingabot nga usa ka . . . Kung sugdan man

nila nga buhian kanang mga bomba batok sa usa'g usa, Ginoo, magkaaduna—magkaaduna—mahimong dili na magkaaduna og lugar sa pakiggubatan. Sila, pagapapason nila ang usa'g usa. Ug, Ginoo, nagahulat na lang kini didto, ug dayon nagaingon ang Biblia nga masunog ang tibuok kalangitan ug yuta. Dios, makita kong nagasingabot na ang maong takna.

³²² Napamalandungan ko ang maong pagpatay sa Presidente, ug dayon makita kadtong usa pa ka dautan nga tawo nga misulod, nga wala man lang gitugotan ang usa pa ka lalaki nga makaatubang sa hukmanan, ug gipusil kini, diha sa usa ka walay-kalooy nga pagpatay. Oh Dios, ingon ka sad-an ang usa sama sa kadtong usa pa. Wala sila'y katungod sa pagbuhat niana. Kadautan sa kaugalingon namo mismong nasud, nga gitan-aw unta nga usa ka Cristohanong nasud, daw sa unsa kami ka dili-maayo nga ehemplo, Ginoo, nga pagka-Cristohanon. Pasayloa kami, Ginoo, sa among mga sala.

³²³ Tabangi kami, Oh Dios, ilabina ang Imong Iglesia, sila nga nabautismohan na ngadto sa nianang mistikal nga Lawas ni Cristo. Nga, “Ang Espiritu Kini nga mao ang nagahatag og kinabuhi,” ingon Mo. Ug ingon nga mikayab ang Anak sa tawo, ang Iyang Lawas usab magakayab. Ug Siya mao ang Ulo; ang Iyang Iglesia mao ang Lawas. Oh Dios, ang Ulo ang maoy nagagiya sa Lawas. Tugoti nga ang Pagka-Ulo sa Pulong mao ang magagiya sa Lawas ni Cristo. Ug hinaut nga mamahimo akong kabahin niana nga Lawas, Ginoo.

³²⁴ Nagaampo ako para sa niining mga nagpataas sa ilang mga kamot, ug sa tanan nga ania dinhi ug sa tanan nga magapaminaw sa maong mga teyp. Ginoong Dios, matinuuron akong nagaampo. Dawata sila, Ginoo. Tan-awa ang ilang mga kasingkasing. Nasayod Ka kung unsa sila. Apan, ingon nga Imong alagad, ako—nagapakilooy ako alang sa maong mga tawo, Ginoo. Akong—gihigugma ko sila. Gihigugma ko sila.

³²⁵ Ug ako—ako—ginapaninguhaan ko lang nga buhaton kini tungod kay nabati ko ang Imong sugo para kanako nga buhaton kini. Busa, Amahan, ania ako, nga ginabuhat ang pinakamaayo nga mahimo ko sa... Pasayloa ang akong mga sayup sa pagkamahuyang, Ginoo. Nagaampo ako nga Imong—hatagan Mo ako og kusog, aron nga mahimo kong mas mapatin-aw pa kini ngadto sa mga tawo.

³²⁶ Karon ubanan Mo kami dinhi sa tabernakulo, karong gabhiona. Tan-awa ang mga niini, Ginoo, kanang mga nagpataas sa ilang mga kamot sa tabernakulo. Susiha ako, Oh Ginoo, ug sulayi ako. Ug kung aduna ma'y sayup kanako, hinloi ako, Amahan. Itugot kini. Hinloi kini nga iglesia.

³²⁷ Hinloi kaming tanan, Ginoo, aron nga ang Pulong mamahimong unod sa taliwala namo ug mapaila ngadto sa kalibutan sa niining panahon. Itugot kini, Amahan. Tungod

kay, akong ginatugyan kini, uban sa akong kaugalingon, ug sa niining teksto, ug uban sa niining mga mananambong, ug uban sa Imong Pulong ug sa Imong saad, alang sa kaluwasan sa among mga kalag, sa Ngalan ni Jesus Cristo. Itugot kini, Ginoo.

³²⁸ Hinaut nga ang Gahum sa Dios mokunsad kanamo ug dihogan kami, gikan sa pastor ngadto sa janitor, ug sa matag tawong ania dinhi. Hinaut nga mokunsad ang Espiritu Santo ug magpuyo Kini sulod sa among kasingkasing, ug gamiton ang matag saad sa Dios ug ipadayag kanamo nga ang Imong Pulong mao ang Kamatuoran. Pinaagi sa Ngalan ni Jesus nagaampo ako.

³²⁹ Ug samtang nga nagduko ang atong mga ulo. “I can . . .” Gusto ko lang nga ang organista, kung mahimo unta, nga hatagan niya kita og chord sa niining kanta, “I can hear my Saviour calling. Where He leads me I will follow.” *Where He Leads Me I Will Follow*.

. . . my Saviour call, (Unsa Siya? Ang Pulong!)
I can hear my Saviour calling,
I can hear my Saviour, (karon isalikway ang
inyong mga dogma ug ang ingon-anang mga
butang)
Take thy cross and fol- . . .

³³⁰ “Ang dili mopas-an sa iyang krus ug magsunod Kanako, ang Pulong, dili takus nga mamahimong Akong tinu-an.”

Where He leads (balik sa Biblia, kon diin didto
ka Niya pagaagakon) . . . will follow,
Where He leads me I will follow,
Where He leads me I will follow,
I’ll . . . (Kung paingon man kini sa
bautismohan, diha sa Iyang Ngalan; kung
paingon man kini sa altar, aron matangtang
ang akong mga kaulawan!) . . . all the way.

³³¹ [Nagasugod si Igsoong Branham sa paglaylay sa maong kanta nga *Where He Leads Me I Will Follow*—Ed.]


. . . Him through the judgments, (mao na kini
mismo karon)
I’ll . . .

³³² Asa man nga bahin ka nagadapig? Unsa man ang makita ninyo sa inyong hulagway diha sa Biblia, ang espeho sa Dios, kung ginahukman man ako karon pinaagi sa Pulong?

I’ll go with . . .

³³³ “Mouban ako sa Pulong, bisan unsa pa man ang baylo niini. Magaagi ako sa mga paghukom sa Dios. Kung kinahanglan ko man nga kuhaon ang usa sa maong mga puwesto, himoa ako nga usa ka magtotoo, ngadto mismo, sa Pulong.”

. . . with Him, with Him all the way.
For where He leads me I . . .

³³⁴ Karon hunahunaa ninyo kini, og maayo. “He leads . . .” 

TULO KA MATANG SA MGA MAGTOTOO CEB63-1124E
(Three Kinds Of Believers)

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Nobyembre 24, 1963, sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org